

楊齋詩集

5563.8
4054

v.1



白
藏
臣

Carpentier

惕齋集卷之一

詩五六言絕句

江樓待友不至

為是佳期在遲君水上樓江流如此急那得繫行舟

曉起觀漲

篙子宿寒雨夜聞篷底語朝來兩岸頭不見停舟處

江樓晚晴四首

江上雨初收雨涯迷去馬林僧晚獨歸隔水見蘭若
林樾既蕭疎汀洲復莽曠行人趁暮潮樹末孤舟放
雲際廣陵城烟中楮島樹高樓倚晚晴惆悵江天暮



柳岸生初月江村飲夕霏漁人收網去深夜未闌扉

江夕

漁翁歸暮雨蟹舍宿寒烟數点洲邊火遙知估客船

早秋歸洞陰樊廬晚步溪上作三首

家近碧溪頭日夕溪風急脩林不逢人水田鷺影立
時向返照中獨行青山外鳴蟬晚無數隔水飛清籟
讀書松根上卷中松子落支筇欲歸去半巔雲氣作

村暮

日落秋原上四山嵐氣碧隔溪有歸人柴門烟火夕

澹園四詠為洪丈大容作

來青閣

高閣對青山浮嵐無定處殷勤如故人朝暮自來去

鑑影池

襟懷澄相照笑語亦堪親何事玄亭上空期後世人

歛月臺

登高發長嘯林木振餘聲一片青天月應知此夜情

留春洞

林花香不斷庭草綠新滋物外春長在惟應靜者知

朝爽閣四詠為嘒齋金丈用謙作

隱岩尋瀑

岩前萬里瀨淺々自東流一勺誰云少終能到海休

古亭賞楓

為愛秋聲多不辭寒澗涉幽人獨去來古迳堆紅葉
晴晝散衰

芸香生几閣花影上簾櫳永日誰相對神交在卷中
靜夜理琴

琴中有何趣聽我七絃鳴此意無人會山空月自明
嘉平道中二首

泉流始有聲岸雪消將盡二月嘉陵途春風吹客鬢
山日翳還吐林風斷復吹春陰入平楚滅沒無定姿

宿朝宗村家二首

孤村帶夕暉流水繞柴扉倦馬尋蘿逕林間鳥亦歸
野老能留客山深節屋清悠悠世上事終夜一溪鳴

春園卽目二首

屋角紅梅樹嫣然笑豔陽猶含冰雪色不作倚門妝
新蝶已成叢紛飛細雨中不知雙翅濕猶自試春風
花下獨吟有懷北里諸弟二首

掃地微吟處風花入酒頻為憐春草色誰是夢中人
禽語忽漸稀林風亦已靜不知山日斜對此殘花影

題畫

石竹當作
竹石

農一作翁

片帆掛寒空江流去不窮
篙師須用力愁殺兩頭風

及敏畫枯木石竹

古樹鄰苔石蕭蕭叢竹斜
相期歲寒節羞傍女郎花

山行即目二首

古樹群鴉啄平莎小犢眠
老農來看黍秋日照山田
草白秋聲起山紅晚照斜
深林逢獵者歸擔掛蒼廬
即事寄廣湖友人

忽有江湖想窓前置石池
微風亦會意吹作小漣漪

紀夢二首

山雨窓間洒松風枕外長
孤臣兩行淚中夜夢君

王

槐龍舞交翠金鴨歎生香袖裡天章在猶疑鸞鳳翔

朝宗道中

清溪十二曲曲曲有深情留我看秋色冷然盡日鳴
稚子始識字手錄唐人詩以授之感題二首時
甲戌秋分前一日也

汝長寧期見吾衰祇自憐留題數行墨百感在他年
早歲窮經志于今苦未衰詩書如可托猶幸免無兒
病中失眠枕上口占二首 六言

面壁孤燈放光背帷小僕酣寢盡數何處鷄聲預商

朝來藥品

愁思窓暗窓明夢緒鐘鳴鐘絕忽聽林鵲驚寒已有
人家掃雪

偶成六言二首

是非蠻觸如許得失鷄蟲奈何荷葉耳根付我杏子
眼孔從他

養生亦覺多事守拙無如力田好是一邱一壑任渠
勃窣嬾姍

詩七言絕句

初秋夜坐

叢莎濕露候蟲啼密葉含風宿鳥棲庭院虛明人不寐一輪微月到簾西

悼鶴二首

身是遼東舊姓丁縞衣丹頂想儀形飛昇寥廓他年事重見人間瘞鶴銘

深：書屋小園春留得胎仙伴此身竹迳花欄如昨日客來誰是聽琴人

唐雍陶詩莎深苔滑地無塵竹冷花遲賸佳春盡日弄琴誰共聽與君無鶴是三人

麻浦泛舟二首

青山轉處捲篷行江水西流鏡面平忽覺帆頭高數

尺楊花渡口晚潮生

淺渚回灣蒲葉青打魚船過水風腥
西江四月河豚瘦柳絮紛飛半化萍

讀唐詩偶題二首

行吟屈子楚江皋杜若香薜蘿
著騷哀怨當時猶不盡千秋寄與柳儀曹

柳宗元

休將陶集較高低數卷詩篇足品題
無限湘江烟雨裡至今應有鷓鴣啼

鄭谷○谷以鷓鴣詩得名時號鷓鴣又有愛日滿階者古集

杜應陶集是吾師之句蓋慕其志節詩則未必然爾

秋齋夕坐

一夜霜風樹葉稀
年光心事兩相違
寒窓短日看將暮
坐數昏鴉幾點歸

題李懋官德懋湖西詩卷二首

要將腐臭化新奇
南渡諸家自得師
合與誠齋充後進
眼前景物揔成詩

摹來真境語還奇
里曲田歌亦可師
誰著湖西風土記
收君今日幾篇詩

冬日早起試筆二首

雪壓茅檐曙色遲
稍聞群雀響寒枝
乍尋殘夢窓全白
卧擁綢衾閱宋詩

袖外輕寒出手知
晴窓試墨硯生澌
朝暉透得雙鉤細
更搨牀頭禮器碑

從隣友求盆梅

枉辦黃花滿地栽
重陽竟失數枝開
更愁辜負書幃雪
未到番風已乞梅

郊行卽目

冥濛烟靄起青蕪
隔樹遙村淡若無
兩三歸來牛背笛
平郊數里戴嵩圖

重題玉流堂

甲午季秋余過此堂
風日清美澗楓酣霜留

詩壁上有樹韵憑虛冷溪光到底紅之句今
來尋見舊題數年之間筆墨黯澹已不可識
感題一詩

樹韵依然前度冷溪光不及舊時紅掃除塵壁尋題
字又過秋風一夢中

梁園雜絕二首

居士崦前水亂飛尚書塢畔樹盈圍
筇頭濕盡山中雨磴道人從來藥歸

人家多住斷橋西野水縱橫罨畫迷
縣裡擔柴朝暮去樵風十里若耶溪

懷豆湖僑居

水鄉風味定堪居
曾向春江買釣車
今日却來深峽裡
樵漁身世較何如

山行

數棘荒寒堆亂石
斜陽欲盡廢田頭
野棠結子珊瑚顆
何處飛來黃褐侯

題王臨川集後二首

謝公才業自超群
誤長清談助世紛
王詠謝安墩姓
偶然當屬我草名
何事復嘲君王謝安墩詩我名公

在眼中公去我來墩屬我不應墩姓尚隨公草名用世說小草事

文章經術好聲名天下紛紛誰秉成若使後人論相業謝公元不負蒼生

送李君德初明復還鄉二首

送子東歸歲暮時鄉園樂事到應知田家酒熟逢殘臘不學南山種荳詞

荷衣久染洛城塵旅食三秋鬢雪新早韭晚菘風味在未妨歸作灌園人

別兩姊歸洞陰悵然有作二首

料峭東風白雪飛謝家柳絮滿征衣吾廬定在溪南岸何處青山是姊歸

東州山水畫圖如好是春風二月初
惟有離憂銷不得大雷頻送紀行書

山居春日二首

嬌雲暖日轉多姿雨過山村畫景遲
屋角繁花明似雪鶉鴉聲裡坐尋詩

風漾輕簾午鳥眠春陰漠漠養花天
山僮數日渾多事忙焙新茶穀雨前

過南山下村家

紅鴨闌邊小釣危數行髧柳拂新絲
斜陽一帶青溪色犢鼻禪張麕眼籬

山行

山雲晻靄草連蹊行到清溪久倚藜記得沙中牛跡
去人家只在水東西

松山道中寄柳君得恭二首

柳嘗僑居松山有
松京懷古詩甚佳

夾溪春樹帶殘陽
島外鞭梢指點長
一抹螺青山色
裡不知何處隱君堂

生花筆落海苔箋
懷古詞成萬口傳
解唱江南斷腸
句那能不憶柳屯田

題松下讀書圖二首

愛此凌雲百尺姿
蒼然古色上鬚眉
問君書味還何

似政是痴人啖蔗時

科頭箕踞任天真千古英豪作座賓
一讀一觴應快意休將白眼看他人

觀董玄宰畫

畫裡秋山照玉堂
搗溪三尺傲倪黃
解衣盤礴非吾

事如此林泉興亦長

玄宰以善畫至遭口語遂剪綃
寫寒山畱有真將枕漱間家具

又入中山篋裡畫之
勾余素不能畫故云

初夏卽事

遲日軒窓晒蠹魚
一簾飛雨小晴初
花香滿院槐陰
轉時有鄰人乞異書

訪申公美 愴 不遇獨坐空齋因書所見

黃花半畝朝陽冷瘦蝶飛來復一雙獨有蠶頭山色
好數峯青峭入書窓

懋官入燕遇浙蜀文士歸後思之談次偶及漫
賦以示

萍流蓬轉各迢遙四海論交只一朝望斷天涯何處
是峨嵋山月浙江潮

秋夜對月懷弟二首

木葉初稀鴈字流更邀孤月獨登樓無端一夜霜砧
響不是愁人也解愁

離懷忽似客他鄉
厭看黃花入醖香
明月不知惆悵
事夜深添着七分光

春晚送金君成礪歸定州

旅舍愁看節物催
臨歧今日更啣杯
梨花不省人將去
挽住春風盡意開

山居四時雜興四首

取次清明穀雨天
平郊草色碧芊綿
山家繭栗今年壯
初試溪南數稜田

松翠荷香繞屋深
微風終日亂蟬吟
樵兄漁弟追涼至
愛此門前綠樹陰

新霜庭戶咽寒蟲
催辦閨中月半功
機響兒啼相斷續
夜深猶見一燈紅

歲晏中林獨下帷
閒居風味百相宜
地鑪滿爇松毛火
恰是山窓聽雪時

仲牧

從父弟
鼎九

不和余詩但易弟為兄賦此更寄

甫我同懷學道心
新詩不作等閒吟
何須更費推敲力
一字猶能比斷金

餞春日獨坐懷前遊有作二首

醉折花枝作酒籌
揮毫擁鼻亦風流
今朝悵悵雙松下
人共春光不肯留

睡起空庭樹影移
閒愁寂寞竟誰知
闌干盡日支頤
坐看殺桃花一兩枝

題牧隱集後二首

中原風雅至
治年范揭虞
楊迭後先可道
圭齋衣鉢

在何嫌不直
海東錢牧隱入元登第為歐陽原功門

外傳圭齋一語尚琅然通來物
價皆翔貴獨我文章不直錢

頭白畫生出
日邊山河萬里見桑田
扁舟卧弄驪江

月又一人間
鐵笛仙公居颶州元亡多故國之思嘗

情與墜茫然中原近日無
消息一箇畫生出日邊

夏日即事

碧樹鳴蟬響四隣
新晴簾几絕纖塵
不須更待涼風至
至早是羲皇已上人

自歎

邱壑初心終自誤
詩書舊業亦全非
百年坐作閒思慮
至竟能成底事歸

蟋蟀

蟋蟀逢秋有底悲
通宵切切竟難知
不能道出渠心事
贏得愁人鬢上絲

秋江垂釣圖

萬疊烟波瘦髮雪
百年心事一絲風
可憐當日羊裘

客猶在君王物色中

金君至自定州有詩屬和

竹樹涼生淨碧烟
高樓留客夜無眠
天涯久別驚霜
髮祇是風流似去年

秋日偶作二首

素葢花開玉佩聯
紅榴結實絳囊懸
菊花羞作貧寒
相擬把黃金鑄小錢

隨意乘涼席屢遷
黃昏露坐石床邊
天公怕我詩情
淡早遣蛩音替暮蟬

初夏雨中懷洞陰山居

楊柳輕風已變薰
故山歸夢日紛紛
遙知白雨青烟外
出水新荷漾綠雲

兩夜監軍馬上戲成一絕

慚媿書生閱禁城
雨中騎馬聽鍾聲
十年未決歸田策
又作拖泥帶水行

禁直雜詩二首

朝暉遙盪粉幙開
綠樹中間函鼓催
一簇紅衫臺下

立 君王親自解弓來

尚方造進新弓分賜侍衛
武臣試其良苦謂之解弓

夏木當簷翠色堆
微吟不覺日西頽
忽聞牆外傳呼急
申漏前頭一刻回

西郊道中

斜陽路入碧溪濱
隔樹鳴鳩送響頻
天際烏雲堆不去
故應作雨與行人

和金光瑞

箕愁

題西梅絕句

羞逐椒蘭入楚辭
孤標肯許世人知
南枝處處皆堪折
得君將寄阿聲誰

騎曹直廬寄隣省友人

拄笏西山爽氣生
閒忙咫尺小垣橫
遙聞碧樹雙蟬響
應有新詩爾許清

恭賡

御製東宮開講日志喜詩

顯宗乙巳重陽日

肅宗在春宮初講孝經

今年舊甲再回

王世子寶嶺四歲以是日

適遵故事因下

御製宣示講院諸臣司書

臣書九承

命賡進

萬筵初設尺衣嶺寶甲重抽九葉莫萬世洪休基此
日先王心法聖人經

秋日懷故山

江上烟波正渺然秋荷應覆舊漁舡
爾來恐被沙鷗笑不到鄉山已五年

坡州道中

小雨廉纖作晚陰平原一望綠蕪沈出籬紅杏兩三
樹溪上人家春意深

葱秀山

弘治初董詔使越過此命山名曰葱秀遂為之記碑已剝缺居民無知者

春草荒崖短碣餘皇華舊蹟問何如一生葱秀山前
住不識人間董尚書

成書狀

種仁

回自燕聞其渡江却寄六首

扈蹕

喬陵忝近臣西來鞍馬又深春碧蹄館外斜

陽路不見前年候

駕人

君家在碧蹄

征驂朝日入黃州悵望京華獨倚樓忽喜故人消息
至春風鴨綠穩歸舟

山經地誌撝焚如芸閣三春閱蟲魚惜未共君更商

略重成海外賈耽書

余承命纂修興誌君以分纂官亦與焉

繭紙烏絲墨搨工聚珍初訖校讐功不知四庫新書

目幾部緇函渡海東

詩家偽體許君裁誰是中原大雅才北宋南施今在否盛名曾說一袁枚

遼薊山河路幾千輜車應有記行篇郡齋春日長如許安得花陰抱卷眠

到郡月餘料理荒政香山僧告以山中花事正

爛戲書牘背以荅

盈床簿牒數旬餘轉眼芳華屬夏初
花落花開渾不管名山慚負老僧書

郡齋夜宴贈江界老歌姬二首

官樓夜飲近紅裙燕寢凝香蠟
燭熱帳裡輕寒銷不得梅花背後月三分

春山螺黛歛雙眉宛轉歌喉似舊時
解唱關西新樂府燈前淚落竹田詞

竹田江界地名產人蔘詞言土人采蔘之苦

送光瑞遊香山

嗟君落拓鬢毛斑余亦棲々墨綬間
今日讓他高興發短驢風雪入香山

光瑞將戎歸裝又用山字詩以挽之

緩唱驪駒莫早還塵中無處可開顏何妨留醉延州
酒共看西樓雪後山

郡齋初夏二首

畫閣陰深樹色堆
隱囊清晝夢初迴
東風不許閒無事
吹送楊花拂面來

半架薔薇出短牆
碧葦裡可憐黃
情知樹密無人見
猶為熏風盡意香

晚眺三首

歷歷孤村入翠微
竹籬彎折抱荆扉
斜陽點綴溪頭

景疎柳垂陰屬玉飛

埜色淒迷落照明漁樵歸盡小橋橫人家祇在林迴處時見寒烟竹裡生

樹葉經霜響自乾西風吹脫轉蕭寒秋山一角窓中碧長許幽人拄頰看

柳村寓舍景物蕭閒喜成絕句五首

我有些車未可巾天教此地卧三春不知若箇頭銜好半是羈人半野人

花事三分二已催梅鬚杏眼占先開春陰較似人情厚約束緋桃待我來

種菜田頭一迳寬
兩行垂柳拂輕寒
好教嫩綠勤遮
掩
權作淵明故事看

花梢交映草香迷
更有茅堂俯碧溪
雙鷺不容相迫
窄也須分我水東西

此身寄處便吾廬
佳境尋思啖蔗如
池館幽深花竹
靜癡心又到滿牀書

蝴蝶

蝴蝶雙雙
弄晚暉
綠陰繁密
花紅稀
憐渠不作林間
夢猶為殘香貼地飛

餅中蠟花

廿四番風第幾回眼前桃李一時開花奴羯鼓無才
思祇打青山白雨來

尹右相著東轅五首

文靖遺風儼老成金甌膺卜絃家聲端明學士當朝
望走卒猶能識姓名

初筵奏語聳朝端相業先從大節看地下陳歐應吐
氣巍然一柱障狂瀾

慈母年高 聖眷敦星文何意暗台垣要將忠孝全
吾分猶有君親未報恩

童年尚憶掃門迎玉貌清談四座傾為著河東先友

記人間今有幾耆英

春風西鄙送靈輶殄瘁悲深淚滿巾
記得張觀參政語平生四字願書紳

小樓看月

樓頭銀漢瀉無聲高捲簾鉤待月生
斂盡微雲方肯出今宵好放十分明

恭賡御製忠武公金應河鐵原褒忠祠詩

出塞初心掃建夷遼河酣戰想英姿
男兒一死應無恨猶及神皇萬曆時

恭賡

御製慈宮生辰日獻壽詩

大酒盈：北斗前
萱堦春色映華筵
至尊再拜
文孫舞一酌新添一萬年

題徐峽杏花書屋圖

何年送老此茅庵
世事悠悠百不堪
祇有道園詩句
好杏花春雨在江南

庚戌春過黃州見州人種柳堤上今來樹已成
行感賦二首

逶迤官路夾清溪
一帶平林罨西迷
爭道黃州好風
景紅闌橋外綠楊堤

柔條嫩葉翠如烟
吹度春風十一年
豈但金城堪下

淚白頭情緒更凄然

以近思錄四十部分與府學諸生因題卷端二首

近思一部是吾師寄與諸生仔細知看到心醒顏汗處方為開發善端時

栗翁要訣緒前賢更有重峯用力專旅館寒燈晝細

字苦心猶為後人傳趙重峯先生嘗於旅店遇一士人聞其未讀李文成先生擊蒙

要訣一部即就燈下手錄一部以贈之

夏日池上

槐樹陰生十畝涼藕花風送一池香小亭不受人間

暑乞與山翁作睡鄉

看書有感二首

縹緲牙籤萬卷書
山齋春日抵年徐
未曾三蝕神仙字
願乞餘生作蠹魚

鏡中華髮雪鬢髻
百態衰年轉可憎
留得一雙清淨眼
不教辜負短檠燈

夏日雜興示家弟叔典

經九

因寓勉學之意五

首

雨洗池堦絕點塵
山容樹色一時新
眼前佳景元如許
只欠從頭啖蔗人

晚向高原插翠秧數家男婦把鉏忙但教活水滋根
葉及到秋來一例黃

兩部池鼃竟夕鳴攪來清夢亦難成此心元自無喧
寂寞問官私捻好聲

不待聞韶月過三菜根風味夙能諳誰知田野尋常
物晚食翻生分外甘

落落竒姿自不同青松挺出衆芳中請看千尺干雲
處畢竟虧他雨露功

澹圃徐公羨羨修自端上寄詩奉和二首

黃溪流水下臨津汀柳江花捻惱人安得春風吹我

去烟波一擢訪玄真

白首窮經樂亦存
藤床堅坐送朝昏
羲皇世界元如

此且向青山獸掩門

詩時余方讀易來
見及故云

贈趙醫二首

工詩嘗隨
使屢入燕

燕垺幾度駐征輪
文彩驚看席上珍
到處應將名字
說詩家自有倚樓人

半世低徊鬢已蒼
舊遊回首轉淒涼
腹中文字知無
用却把奚囊換藥囊

夢澹圃

夢裡相逢眼亦青
覺來林月滿虛扁
定知酒不澆墳

土却向人間笑獨醒

夢中勸余
時近杯觴

溪上晚望

渺渺寒波起白蘋
西風吹墮小烏巾
數行鴈字縈空去
欲寫秋懷寄美人

志感

慟哭橋陵已十秋
夢中猶復近珠旒
遺臣白髮今如許
喬木寒山古永州

墊行

漠漠輕陰四野垂
川光樹色兩迷離
蹇驢偶向橋南去
正是青山欲雨時

題墨竹

胸中自有拂雲姿
寫出長枝復短枝
多少世間皮相者
此君風味竟誰知

溪行即目二首

冰泮青溪樹映霞
晚來風日轉清嘉
寒禽共對沙頭立
已有春流匹練斜

野外人家畫寂寥
偶隨流水度溪橋
東風過處渾無迹
祇遣輕黃上柳條

池上小立

吟繞池塘獨倚筇
柳邊春水綠溶溶
孤雲過鳥無留

影照見橋南一兩峯

哭新瑩三首

不見三年意轉哀
扁舟今日為君來
空山野水伊誰在
惟有林花寂寞開

垂老求閒始得閒
故鄉同輓鹿車還
那知白首如絲淚
洒向春州一片山

細數歸程百里遙
江花江草搥魂銷
人情不及東流水
又度青溪十二橋

送士庸

庚從叔壩

之碧沙郵官二首

君是何官似馬曹
前身應作九方皋
要知多少鹽車

下自有騏驎骨相高

廿六年前正黑頭曾持龍節按南州試從雪上尋鴻
瓜可有遺氓說故侯

池堂雨後四首

檐頭盡日雨聲懸林翠如流綠滿川野徑無人通
侵齒荷花開到短扉前

蒲葦蕭蕭送晚涼滿池雲錦媚新粧酒醒夢斷疎簾
下風使飄過數陣香

過雨階前長綠苔柴門自向樹邊開一塵不到高樓
上只許青山入座來

日出林霏淡欲收
新晴池閣轉清幽
練衣蒲扇銷輕暑
早有吟蟬已報秋

辭湖藩謫參禮行
過華城恭瞻健陵馬上泣

賦二首

喬陵松栢鬱蒼々
廿載光陰逝水忙
慟哭孤臣猶未死
不知何日拜雲鄉

耳邊天語尚琅々
魂夢長依繡座傍
欲報深恩那可得
白頭空有淚千行

蔡君一祥自湖西有詩見寄問及出處和韵以

謝四首

畿北溪山說永平思翁心跡許難清由來地亦因人
重不獨靈區合擅名

廿載林泉自在身忘他憂樂任清真行藏異趣同歸
潔強意安排却損神

千里鄉園信息稀夢中猶理舊簑衣耦耕宜待高人
約祇解扶犁便可歸

蔡君錄寄錢虞山耦耕堂記曰讀此當有歸興

二老風流不可攀仙區分占好江山桃源緬想知吾

拙歸卧蓬庐且掩関

清風宰尹濟弘能詩西永春宰俞漢芝工篆隸蔡君將以明春

共遊四郡山水書報其事笑余之不能辦此

藩館堂後竹石可愛臨歸留題二絕

脩竹檀欒翠色分更憐奇石點苔文簿書蕪沒終何
補祇欠新詩贈此君

故山風物眼中明一謫三年始返程猶有依、回首
處碧琅玕邊小崢嶸

途中記見

誰向青山共結廬門前時釣錦江魚桃花籬落春風
靜雖未能詩我不如人陳簡齋詩春風漠漠野

惕齋集卷之二

詩五言古詩

秋懷二首

端居感時物蕭然庭戶秋
撼三疎林響耿三明漢流
人生幾少壯歲月不可留
俛首事遺經抗志希前脩
中夜起三嘆寒蟲鳴未休

其二

我有所懷人久作殊方客
闌干惜別處葉墜高梧夕
蟬嘶暮雲長鴈去秋江白
湖山千里夢清境統枕席
思君欲何贈願為道自適

夏日遊太古亭

謁仙源金
公遺像

深巷多喬木幽尋轉仄徑
山雨晚自收林風涼未定
芬馥草香至縈回澗籟亘
松影靜堪藉鶯啼婉誰聽
名賢曾卜筭遺像尚起敬
高蹤緬杖屨英靈宛效謦
孤吟寄遐想匪徒悅幽性

雨後從西岡口步至白雲溪作

携筇出柴門微雨過平陸
危徑轉迴紆崇岡屢重複
忘疲演閒步放懷肆遐矚
疊巘連蒼翠高原散禾穀
遂從石門下偶至雲溪曲
川涂暖新晴墟里翳嘉木
水花方掩暎野艸皆膏沐
松頂涵歸雲岩隙掛殘瀑

游魚乘空明飛鷗破淨綠延賞入曠達舒吟慰幽獨
孤抱寄冥鴻塵心晒蕉鹿匪洗巢父耳庶濯孺子足
棲遲在邱樊往來混樵牧永懷蘓門嘯偃蹇青山麓

散步溪上晚歸草堂二首

被酒邨南去秋山入迴眺雨餘積翠多樵徑隱半嶠
深崦起暮烟晴川媚晚照遙見蒼牛返時聞水禽叫
田頭或植杖石上復垂釣鄰翁不相期偶坐成談笑

其二

吾廬在水北雲樹共迴合林壑含清暉溪山秋氣集
顧景感離索迢遞望京邑田園夙所遁漁樵近相狎

清晨理屨鞋往尋農巖峽名賢昔掛冠
逝將高風接
晚往溪上送玉屏故人

林窮沙路出歸人當渡頭孤榜下長川
斜日冷亂流
遙送山中友獨成溪南遊水波久已定
桴音隱蘆洲
薄暮行歌返惆悵數峰秋

冬夜寄山中故舊

閉戶經三冬圖史自怡悅深知靜者趣
久與塵緣絕
松下斲人蹤小徑明殘雪惟有孤月來
伴此寒梅潔
遙憶山中侶幽懷徒耿結猿鶴應相
待不歸真吾拙

南軒夕望

微輝在曲欄雲端初月素殷々
暝裡鐘黯々雪中樹
夜久羣喧息天寒棲鳥聚孤抱
嘅晝短忽茲歲云暮

宿龍津村舍用韋應物韻

朝出城東路暮至江上驛千峰耿落日人烟澹初夕
炎靜灘響高林昏雪輝白遙夜一燈明照此孤眠客

從友人乞墨

海山百歲松輕烟結花翠黃明鹿角膠不借魚胞膩
玄霜擣萬杵劑造功未易佳品出高麗幸行墨家謚
樂浪數珍材平虜辨款識陸友仁墨史高麗貢墨其
文曰平虜城進貢按高麗
平虜鎮即
今永柔縣妙手無張氏遺法久失墜墨史李公擇遺
東坡墨半丸其

印文曰張力剛云
得之高麗使者

海上稱上產舉世拱壁視奚潘一

回顧聲價盡掃地余也支離人弱冠從文事吟詩已
成癖著書亦有意瑣碎蟲魚疏日寫五千字頗能作
八分時復倚小醉晴窓拭几案笑看羣鴻戲聯翩四
友來久虛客卿位切心涸舊貯尖頭渴新漬慚非玉
堂賢敢希隄廩賜知君富詞藻臨池百好備名硯採
藍浦妙繭具白礪更有盤龍璧什襲藏巾笥庚子玉
理橫蹙蹙犀文綴誰云徑寸寶賤即土之類

說文墨
松烟土

也類

母令墨磨人快許數餅寄

山中大雪有懷仲牧

山齋坐清曉開門雪滿谷皓色被羣山澄輝生衆木
岩阿失樵徑村墟惟白屋日出林風高吹烟微斷續
孤襟皎無滓清境紛溢目不見冰玉人誰與慰幽獨

酬李懋官

故人三疊詩春雲翳滿室指麾眼前境驅向腕中筆
譬如寫竹人少縱即還失看君腰腹小何以容萬帙
杯酒偶相屬談笑正未畢絢緼吐佳句令嚴意轉密
我欲和郢曲感歎良非一

再疊

風雨並不出端居惟一室垂名自有道不願仗史筆

隻眼信千古著書勘得失久決歸隱志手抄盈卷帙
煩君少虛徐待我婚嫁畢為開羊求徑深山剪蒙密
寧復歎貧賤東方有士一

三疊

寒梅在我側明月入我室相對便忘形意到時拈筆
清輝望不極暗香聞還失幽襟寫玉徽忻賞披素帙
之子復起予佳興無終畢深情有寄托微言詣精密
蕭然謝外累萬慮守貞一

四疊

紙牖映春雪虛白自生室清景發孤吟對此忽停筆

遙憶峽田荒復恐農期失明當把鉏去獨帶腰間帙
燒畬時及早鑿池功先畢添種萬頭松結廬雲林密
百年事耕稼願為民之一

早入朝宗峽

朝暉淨萬山迤入松陰裡窮峽少樵蘇木葉滿地委
谿流百迴折獨徃意何已斧響靜或聞畬烟時自起
卽事忻幽賞遂此遊興始求田恨未早小郡饒山水
會須縛茅屋重到挈妻子

仲牧與余分居已一月久雨有懷却寄

中林暑氣殘空階雨聲積苔色遍深青榴花斂微赤

懷我北山居卧此高齋夕別君已三旬殷念何由釋

月夜懷仲牧

微雲吐華月庭院霽景深披襟步夏涼履舄交清陰
花影翳脩欄竹韻諧素琴孤懷寡所歡幽賞誰共吟

同金兄孺成

晚淳

暮自龍山放舟至鷺江祠

江水清如此輕舟任所之汀樹乍迴轉雲山欲動移
落霞捲餘碧涼風送晚吹漁釣自无悶鳬鷗亦相嬉
聊為散愁疾偶茲成幽期沿洄在中流不知願從誰

秋夜懷仲牧

宴坐忘夕曛高梧近小堂繁蟲已在地新月亦流光

離羣感歲華况茲秋夜涼

記夢

夜夢仲牧來言夢與其友某飲酒賦詩有云
翠柳千行黃庭一章覺來意甚異之作此以
寄時戊戌涂月十一日

曉夢見吾弟傳我夢中句云有會心友文酒共良晤
夢裡夢人夢厥理定難滌伊人果有諸顏髮未曾選
若謂止是公姓名將焉傳黃庭與翠柳語頗神理具
以此為吾詩丁寧君所作去聲縱使歸之君匪我亦莫
喻因茲發深省始覺浮生誤百年吾與爾孰非夢中

寓况彼文字名真是則者屢我復出狂語無乃夢未寤

齋居感懷寄仲牧求和

春雨霽中園百卉日華滋生意各自遂天心信無私
大哉洙泗教成物亦如斯微言幸未絕至化慨莫追
周程緒遺緒簡編有餘師嗟余晚聞道感彼榮木詩
朋友鮮磨礪歲月任奔馳常恐志不固終為習所移
來者苟如今進脩諒難期吾弟美無度粲然圭璋姿
雖云蓬與麻庶比墳若麓慨慷以相勗矢此金石辭

暮春會飲和仲牧德柔

從父弟
用九

峭蒨園中樹丰茸池上艸今我不見君誰與共幽抱
嫩陰敷清晝高雲媚春昊壺觴酬美景篇詠適嘉藻
所恨年光速又值薰風早昨日花滿開今朝已如掃
良會苦難遘人生諒易老願言各努力及茲顏髮好
誠之

再從弟
鳴九

遊玉屏未歸同仲牧宴坐有作

秋氣入虛堂蕭然四壁冷主人雖不見琴書亦自靜
稍休鞍馬勞共此清幽境羣山送微雨疎林懸畢景
荷香始一至蟬籟晚逾警采藥思韓康卧遊懷宗炳
坐緣諒已除遂使心期永

山齋夜坐

惜：暝色至悄：南軒夕蟲語靜生喧螢光暗流碧
遙夜轉起忽萬象俱沈寂祇有西林月殷勤照孤客

禾積淵

縣人禱雨處

吾鄉好山水茲潭最詭異真宰造幽境竒想偶一試
聞名昔已久冥搜今乃至攀緣蘿磴危側瞰松壑邃
峽東川流轉崖斷壁色翠鉅石始盤陀孤撐忽疊巘
回湍中激湍相遇而不避嵌竇開一泓深碧疑徹地
高雲見倒飛圓日鑑炯墜陰森吁可恠下有神龍閔
物性能變化蟠屈豈無意會當起風雨膏澤四野施
過石林寺少憩清風亭作

亭在清節祠傍祠享清寒子金公時習

岩崑東峰下岩谷窈而深清寒曾遯世遺像傳至今
披緇托遐蹤留髯見夙心佯狂雖自晦苦節亮所欽
悲哉采薇歌千載有餘音童年感遭逢名義尚不侵
况彼食祿人得無愧紳簪荒祠鄰梵宇偶此成幽尋
霜樹雜丹青石泉鳴璆琳秋光共皎潔聊為一沉吟

志感

牲：野中鹿戢：淵底鱗交：枝上鳥顧疇疇新春
物類尚如茲矧伊同胞民允矣先聖訓朋友即天倫
虞翻慕知己所願得一人陶潛思命駕千里視比鄰
咨余復何為繫無心所親撫躬慚薄劣感懷多悲辛

善士能尚友君子貴誠身終古已皆然此義竟誰陳

山亭夏夜

明月滿房櫳微涼散襟帶竹露淨幽光松風生暗籟
神怡衆妙內志適萬象外欣慨祇自知沉吟竟誰會

秋夜感意寄示諸弟

輕颺振高樹新涼集西樓仰觀天宇清渺々河漢流
悽愴絡緯吟蕭凋梧葉秋攬衣起徘徊感歎時月周
朱顏日以頹素心將焉酬慨然三古想邈矣千歲憂
生晚已云悲無聞良足羞區々榮與名豈暇勞外求
墳典有至樂岩壑事優遊含情寄所愛及時當自謀

將謫蔚琬曉渡漢江作

昨從銀臺直夜走嶺海路小臣本愚妄授荒荷大
度倉皇拜慈母約略整家務嚴程自有期不敢更少
住逐客方東行長江忽西注天水互冥濛積氣成曉
霧人聲稍近村岸影微辨樹颯々寒風吹漾々孤舟
溯南山暝裡高中流屢回顧念余山澤姿久為軒冕
誤羞作市門客強學邯鄲步雖非馬戀豈却似鳥入
笄朽木謝凋鏤俚曲慙韶濩譬彼負版蟲任重還自
仆前身現宰官初服返韋布榮辱判俄頃貴賤殊朝
暮衆見自不同而我則如故浮生元夢幻豈待黃梁

寤胡為世上客汲々相馳騫

早發慶安驛

旅枕不能安，蓐食待鷄鳴。主人亦早起，向我指去程。
出門霜風冷，入谷晨霧盈。小炬似流螢，濕烟滅還明。
亂石若無路，悲泉但有聲。須臾天漸曙，初日澹光晶。
露重明珠炫，嵐輕素練橫。草際鷺影寒，稻隙蛛網縈。
却忘行役苦，忽起田舍情。吾家洞陰曲，繞屋溪山清。
陂荷展雲錦，澗松奏風笙。春圃擷嫩蔬，秋畦割新杭。
自余事宦遊，裘葛已屢更。人生有真樂，不在公與卿。
胡為牛馬走，久負猿鶴盟。行當謝簪組，歸向南畝耕。

午飯楊根邨舍嘗新稻甚美

新杭鑿碎玉晚豈圻挾劍西陽雜俎樂浪有挾劍豆松蕈劈肌香

菁菹入骨醢饒涎已湧泉大嚼如填塹城市少真味

飢渴况易厭憶昔侍金殿賜食殊禮忝余與諸臣嘗思侍

食于誠離梓珎羞錯歎樽仙酒灩添載御案撤餘

餐近臣覘侍食時御膳有異味上或親撤以賜之食將畢命注書視所食多寡以奏

去歲守西郡厚祿亦久占公堂設夜譙高燭吐華焰

嘗食丞帽低寧邇府都務土官從五品無他職掌傳每府使進食輒來候楹外一拜而退

杯妓裙艷榮悴不可常晚炊寄孤店顧我徒哺餒長

物即鉉槩平生嗽虛名有如恣箕歛過飲輒思醒久

疾當遭砭炎涼遶回薄厥崇頗類疴方今水潦備秋
事已告歉山畬粟粒稀野畦禾穗墊田家空作苦糠
覈尚不厭問余獨何為盤飧幸自贍腥膻眼既飫菜
藪指更染酸甘且勿論一飽均為僭莫辭遷謫勞每
飯 君思念

過月溪

羣山忽奔迅大江合而派蒼崖俯深碧仄迳相縈掛
巖崩艸勢披水嚙沙痕壞我行方斜日秋天弄光恠
白雨時飄灑寒雲遶明晦西風吹岸樹落葉如掌大
危途已可駭神意竟難會遙看兩三船掀舞浪花外

不愁高檣歆但覺輕帆快寧知蓬底客望我還如畫
勞生固無別履險俱有悔軒皇作舟車厥象蓋取卦
空令後世人易忽垂堂誠神農是吾師辛勤為耜耒
莫歌行路難歸歟理荒穢

暮入原州二首

紫翠紛千狀斜陽轉蕭瑟沙上返樵稀煙中飛鳥疾
不識青山暮仰觀踈星出

其二

微月在我後暝色生林邱邨深一犬吠野靜孤螢流
隔溪踈燈照方知近原州

橫城峽民苦山獸傷稼結巢樹上晝夜警守感
而有作

峽民事火耕薄田在窮谷深榛拓畝翳庶艸開荒鞠
斲此再易地成彼十夫牧縱橫作區畝高低散禾菽
斜塍蛛布網密穗蚕聚簇全家待一飽日望青山麓
今歲多秋雨山菓亦不熟飢熊厭舐掌曉豕窘充腹
黃昏試獨來白晝呼羣族齧黍如齧芻勢甚風雨速
計窮方自謀豈知農人哭所嗟終歲勞將無數月蓄
同鄰共約誓守畝相警逐苦覆費葦茅結架依松櫨
危柯響鈴鐸暗叢施鋒鏃朝學山猿挂暮與林羽宿

使運當作
卷八

哀女爲小人義當田功服食力誰不然乘危爾所獨
天心重稼穡未忍甘暴殄多糜聖亦書祭庖禮非黷
窮黎何罪辜惡歟更蕃育無乃憫哀漓淳風返搆木
但使還古世未聞糴民穀穿穴生簿書低昂任斗斛
細利競錐刀苛政恣鞭扑茲害未決癰其痛劇剜肉
徒令俗自美或恐計已蹙惟願皇天慈屢降豐年福
三春勤鉏犁十口絀饘粥木處雖恂慄無異卧莘屋

宿安興村

疲馬不肯前暮投安興村山深畏虎狼居人已掩門
槲皮編作尾松腸劈爲藩東簷茈鷄犬西隅繫牛豚

於焉共寢處：養兒孫生長地。鑪邊不識衣與禪。
老翁六十餘，言貌樸且敦。延客坐煖突，啜婦具夕飧。
竈下聞咒聲，松燈耿破昏。吾廬白塢西，蕭洒謝坐喧。
花欄望明月，竹窓迎朝暾。清賞卷軸橫，古氣罍鼎蹲。
有此不甞安，歧路苦馳奔。今日向窮谷，幸借一宵溫。
媿君板屋下，偃仰樂意存。

山下六七里，有一溪亭清幽可愛。石上題曰訪
道橋，意其有隱居者。

虛亭鎖林霏，四顧秋山暮。石瀨鳴未已，木葉落無數。
不辨烟外邨，但見松下路。應有隔溪人，抱琴自來去。

過嶺

不咸裂南支千里一奔騁勢欲障大海布置未暇整
衆山不相讓萬象各自逞羣龍並矯尾怒馬急振頸
挺：簷樹羽盛：裘挈領傲兀天為黨逡循日迴景
偶有一罅隙或聚小閭井自古要荒外別開蕤貊境
雄哉漢武帝威畧海隅靖彭吳穿道來南閭欵塞請
遂同內服視庶為遐土幸禹跡雖未暨周禮尚可秉
曷不期一變棄擲在俄頃李冰鑿三峽梅銷通五嶺
至今蜀粵區文物萃夏俚聖人欲居夷此意誰能省

漢書彭吳穿蕤貊朝鮮置滄海郡服虔曰蕤貊在辰
韓之北高句麗沃沮之南東窮于大海按今江原道

嶺東西
即其地

觀高麗張良守賜第牒

有客鰲而髯清晨杖策至長揖道姓名危坐揆衣袂

蔚玆海上縣素無簪纓系乃祖張樞密良守官至樞密副使云

大顯高麗世少年遊京國一朝取科第青雲遂展步

金紫竟躡位當時賜第牒十襲傳後裔聞子頗好古

聊欲相誇示開帕錦折紋展軸紙生毛毳盤屈墨光黹

錯落硃印細牒上安硃印數文準皇宋式號填泰和

歲牒式畧放宋朝後署泰和五數行幅尾書筆法尤

詭異蟬聯五官輔並署平章事牒末有參知政事王同中書門下平章事

任崔奇崔五人俱不署名意為知門望略可辨名字
貢舉者字體非隸非楷亦頗不類

誰能記吾聞三代法取士德行藝後世崇科目人物

日衰敝偏邦少全材籲俊當隨詔安用較雕蟲空使

困良驥敝源自中葉厲階即雙翼高麗睿宗用雙請

看牒中人早捷三場試功業雖未詳富貴真得意倏

忽彈指頃盡付東流逝惟有一品孫逢人謁新刺王禹

甫有一品矧我樗櫟姿甘為匠石棄徒招識字憂苦

受造物戲旂常與鍾鼎已自非素志今更遭困踣竄

身滄海際秋深瘴霧昏地卑篴節翳靖言思厥咎搃

由一第累雖復噬麝臍無因救猩醉幸餘文墨緣眼

見前代字題詩作掌故放筆還長喟

宗人邁寓居砥平聞余至三訪謫廬感懷贈詩

三首

謫居無舊識吾宗忽相見外家龍門裔流落在茲縣
歲晏尚被褐寒風慘顏面自言少失學未敢辭貧賤
望我作高官牙纛照畿甸幸托先祖孫要為鄉里羨
何故反蹭蹬遭此嶺海譴我聞發孤笑謝子情眷々
人生百年內誰不懷珪弁升高易顛隲涉險多絀綽
幽々炭山里有土頗沃行屋後松林密門前溪水濺
我宦固不達子耕且莫倦

其二

生理苦艱難窮山斲寄跡傭人二息田

山田一畝所耕謂之一息

親手剪荆棘為彼數口食罄此十指力新穀既登場
未足充甌石婦本農家女布葛麤能織今歲木縣荒
竟卧無一摘飢寒乃吾分倖免非良策惟恐里正來
叩門催秋糴常恠仕宦人輒說躬稼穡稼穡有何好
終年但愁色我今雖在家無異君被謫幸得完官租
快若登仙籍斯言亦有理忽使余心惻求榮必見辱
取樂還懷感萬事無全美造物相煎迫不如且置之
一笑便自適

其三

草露濕衣屨清曉到柴門背後何所携小童貌如猿
坐定忽慙色良久始有言鄰家出新釀不似邨酒渾
寒菁採小畦秋栗拾後園山菓甘勝蜜霜林結實繁
但恨時節晚零落半無存深峽鮮美味瑣々不足論
念子為客苦聊欲佐朝食呼奴解筐筥感君辭氣溫
世人酣外誘親戚亦寡恩窮途始相憐有如葉歸根
我雖竊寸祿未嘗及山村今日愧此餉物微意彌敦
相對一舉酌節檐共負暄

秋初求佳菊而不得謫舍偶有數本爛開客有

言黃花笑逐臣者遂作贈答二篇聊以解嘲

贈菊

我本少朋友耿如孤月晨時與卷中人交道托以神襟懷雖相照談笑無由親徒然增悵想畢竟非好曰聞君抱貞姿清介出俗坐願言接高風邀作座上賓胡為避逃我妄擬商皓倫今朝忽相逢乃在秋澗濱勁節凌寒霜高標照高旻羈愁便如失所幸得芳鄰但君多傲態含笑見逐臣虞卿善急難子素能救貧窮途節義見此事無今人君又作冷眼恐傷君子仁交淺忌言深我獨披情真倘子不我棄傾蓋自今辰

菊答

君子不妄交古人貴下士聞君頗讀書庶幾知此理
爍：洛陽園滿園千紅紫君方逐蜂蝶飞舞春風蕊
孤芳忽自銜能得一回視我性本耿介獨立霜雪裡
遂得傲之名其實亦偶爾靈均行澤畔淵明卧栗里
是皆窮餓人我猶稱知己坐世少開口甚或河清比
而我獨不然中和發外美持此好顏色與人相慰喜
謫仙非長者醉語輕嘲毀君今又見猜無乃內自恥
磊：澗底松歲寒堅素履君心苟非石我交當如水

醉後偶成

將一作
節齋坐讀書邨童來聚觀田家穫新稻我亦倚窓看
書好汝不知稻熟我不餐聊為視聽新相與一開顏
物情固如此浩歎秋風前悠々去來今了此百年身
去者空悵想來者妄跂延誰將眼前境所遇能自安
非徒賤勝貴亦或富羨貧向平猶未達辛苦入名山
我方為遷客甘受衆人憐榮辱兩茫然一醉良足歡

嘲畫史

近有一郡守從人乞畫其人偶作陶淵明歸
去來圖守以為風已去也大怒拘而台之客
有道其事者戲書此詩

淵明是拙士未聞通吏事彭澤八十日但飲秫酒醉
終然賦歸去諒由素餐媿豈若今世人所在稱循吏
非無好田園欲歸民不棄何物妄畫師錯解乃公意
畫者必肖物不然畫則偽畫花當染朱畫柳當抹翠
枯木與瘦竹祇可供墨戲作畫昧畫趣扑汝、勿恚

元生送芥菹

綠芥抽新莖霜根削如玉葱芽切嫩白椒氣助微馥
山家作冬菹美味冠衆藪寒厨致一壺冰蹊走老僕
登盤頗先香動箸指忽速平生學咬菜近日甘脫粟
漸令脾胃安已與牙齦熟鮮肥豈不佳淡薄真所欲

從知薑桂性養自藜莧腹囚山儻能脫歸田行且卜
乞得君家種移向黃溪曲手鉏數畝荒坐待秋雨足
差可配巢菜庶免譏何肉

題陳洪綬畫二首

艸蟲

艸蟲產艸間形質何細瑣或在葉底跳或在花上坐
通身具艸性生氣流婀娜吾聞柳州語天地大如巢
人生於其中亦是蟲之裸靜想造化心如蜂祝類我
何不踐厥形物理寧偏頗老陳寫此紙妙趣入么麼
我作如是觀戲言無不可

蝴蝶

莊周化為蝶物我視同彙猶復詆儒墨放言多觸諱
蝶雖有美髯未脫脂粉氣但尋香處嗅翾飛弄春卉
何好亦何惡一言了無謂侶得保身要自許知道味
豈識擔間蛛吐絲張絰緯語默俱不可得失竟何既
請問畫蝶人此意君會未

余近欲止詩季弟

韶九

有詩來示遂和其韵

吾身似轉丸遇坎止則止一卧便無事閉門空山裡
君詩破天惝綽約如處子遂令病維摩生此大歡喜
草芽被雨動水波因風起得句本不期偶然成文理

應物輒隨緣引興非由已忻戚都妄耳妍醜俱寄矣
世事若秋水四顧迷兩溪間中送一日忙處敵千禩

再疊

林花靜色相水鳥閑容止斜陽似畫圖照影清波裡
幽澹比高人皎潔想公子何曾適：驚有若沾：喜
綠漪靜可鑑微風湛不起我亦忘機者偶坐觀物理
花為我平生鳥為我知己佳朋無得之所願良足矣
無何是吾鄉從此問津溪寧紉芳蘭佩肯饗爰居祀
銀臺上元對月贈伴直南元平

公轍

皎：新年月流光入禁省林木散清華殿宇生虛靚

春言同舍友惜茲良夜景願將冰壺潔聊此素心耿

玉溜泉侍讌承命恭賦

癸丑暮春之廿日 上召諸近臣賞花于禁

苑之玉溜泉崇朝適有雨 上欲退卜宅日

聞諸臣既會因以 步輿御籠山亭諸臣分

坐太極清漪逍遙諸亭林雨滴瀝礪韻琮琤

既宣酒食 命依晉人蘭亭故事各賦一章

臣書九進五言十韻

時景屬昭陽佳氣滿漢甸池籞紆宸矚草木被

聖眷華館頻窈窕玉流翫回轉微雨霽方集光風晚

更扇礪葩紛馥郁林綠始蕊蒨卷阿懷德音洛水承
嘉讌飛觴徵舊禮授簡會羣彥跡卑恩徃洽地嚴
勝亦選寔為隆和樂匪忽戎遊行陳詩頌熙運才拙
媿芬紉

夏日登寒碧樓作

出郭謝坐囂登樓騁遐想山雨忽飄灑溪風始浩蕩
嘉樹貯夏涼脩竹競晚爽俯臨平時疇綠仰觀霽景朗
叨守大藩地幸值年穀穰亮乏及民惠屢獲忻心賞
觴詠有真趣絲管寫新響素餐良所愧冲襟庶自養

寧海謫舍置昨年寒碧樓韵

榮辱本外至忻戚俱妄想此地竟何許雲海正漭蕩
安坐便吾鄉羈懷亦蕭爽長空送皎月照我戶庭朗
聊同田父飲樂茲畏壘穰雖無絲竹娛舉眼即清賞
起步風松影卧聽秋濤響於焉寄天遊浩氣真可養

太學思杯詩承 命共賦

戊午季冬 上召太學諸生試藝于庭以內
府思杯宣法醞銘其腹曰我有嘉賓俾蒞之
太學因推原易象作為訓辭申命侍臣暨諸
生各颺其言左承旨臣書九獻五言詩一章
聖后立民極至化方溥博流行二儀間與道相醕酢

藹然生國盛允矣君子樂啣之在野鹿宵雅有深托
中心式惠好錫汝以康爵綢繆釀太和一氣扇橐籥
風雷所鼓潤鳶魚自飛躍有如羣飲河隨意各斟酌
恭聞制器象大易垂矩矱淵衷默契悟訓辭何灝
聖物理既昭著神功在冲漠羣黎徧為德洋洋頌聲

作

途中紀興五首

征車且緩驅路轉青山曲殊方節物晚麗景紛盈矚
林薄帶餘斑川原藹新綠於焉暢心目莫使歸程促
軒冕豈不貴衰懶已知足悠々此行邁勝彼名繯束

其二

四野耒耜出耕播及春闡民生當食力豈敢辭艱難
田頭罷午饁人牛相對閒焉知沮溺輩而不在此間
新畬正可斫我亦懷故山胡為事形役垂老未甦安

其三

前隊出林垌後騎飛黃塵笳吹動里閭夾路看朱輪
豈是舊相識遑俗重王臣昔賢病素餐所貴非簪紳
我今偶啣命來見涓鹵春八載在廟堂愧爾耕鑿
民

其四

邊郡豪俠兒力挽五石強躍馬臨荒磧撫劍視天狼
此輩苟善用一死報明王要當激意氣不必憂封疆
君看車與崔大義日月光奇材遇時見往往出尋常

其五

父老自何至遙自藥山城憶曾叨郡綬歲月今幾更
去遭鞭鐙截來見酒食迎賓慚清淨理枉荷淳樸情
舉手謝諸君歸歟事蚕耕雖乏桐鄉爰余亦思遺岷

左峴城

有東林西
林二城

東林既窈窕西林復嵯峨曾城亘粉帶仄徑盤脩蛇
自古關防地經畫信森羅但見閑百雉未聞走六羸

時清壯士閒戎樓空枕戈昇平念艱虞廟略當如何

良策館

野館住行旌登樓春日暮喜茲得佳境稍復屏坐務
妍：松間月熒：花上露夜色生虛明泉聲瀉韻漢
悄然倚孤枕清夢亦屢寤沈吟邱壑想惆悵關塞路

曉星嶺

躋險固未易春風逗征旆身行萬木巔目極飛鳥外

俯挹三江小橫跨數郡會遙看西蓋馬

韓百謙東國輿地誌以妙

香山為西蓋馬

縹緲出雲靄偉哉徐侍郎拓茲疆域大安得

如此公永使民國賴

麗初安州以北沒於女真徐熙始為拓土置郡

箕子墓三首

兔山高崔嵬上有父師墓新雨麥正秀我行屬春曠
祠官肅前導下馬松間路古閣丹青暗斷碣苔蘚聚
徘徊久不去悲風生四顧惻怛千載心悵然起遐慕

其二

鳴條與牧野等是彝天罰如何有夏世未見一苦節
三仁各自靖賢聖有餘烈懔懔君臣際悽愴去留說
須知陳範意不愧夷齊潔再拜復長吟感激中腸熱

其三

不有夫子東吾其左衽哉永懷罔僕志端為避地來

遂令衣履藏托此空山隈傳聞或異辞羣疑邈難裁

史記索隱箕子墓在梁國蒙縣

豈是朝周日白馬竟未回往事劇蒼

茫滿壑松聲哀

回磧石

斷崖忽千尋倒影入寒碧根蟠厚地裂勢含元氣積
色留媧皇鍊皺費巨靈劈特立幾萬古意與狂瀾敵
始知勁真姿亦仗造化力我欲一長揖匪徒南宮癖

由青石洞入大興山城

忽聞潺湲響已知入山處一徑皆樹色終日但鶯語
岩谷窈而深漸與人境阻飛湍乍喧喧羣峯競軒舉

從茲事幽討遂復銷塵慮之子期不來臨風更延佇
徐留守入都
有約不至

甲子六月將赴西藩滯兩坡山和陶詩阻風規

林二首將寄斗湖徐相國

龍輔

首駕關河路緬想山澤居巖穴信多賢余何歎予々
親朋送我行鞍馬集城隅雲物變新秋川潦亘脩途
羨彼所懷人逸興在江湖勞生豈吾願垂老詎太踈
雖無經濟才愛物或有餘持此謝窮黎出處竟何如

其二

淵明一為縣欲去便去之人生貴適意本與名不期

我今徂西土積雨無歇時川陸險且阻征車淹在茲
儻能撫凋瘵辛苦亦不辭但恐此棲、終為識者疑

和陶詩楚調示龐主簿鄧治中將寄海西李觀

察性老

存秀

舉世工俯仰我拙君亦然勗此歲寒操聊以慰暮年
衆人苦見嗤無乃性太偏愚樸寡所諧上策即歸田
朱輪擁節旄不如借一廛貪當帶經鉏倦可曲肱眠
窮達有定分豈為浮榮遷惟將好心期獨契千載前
紛、毀與譽起滅若雲烟身困道始亨君請視昔賢

嘗芹甚美戲示李君

濫

日食費萬錢把箸輒彷徨我無食肉相困此蔬畦羊
春芹上盤來美味忻初嘗濯以檻泉流採自青泥坊
預知腦膈爽頓令牙頰香誰云物微薄亦可獻君
王書生有食籍壘壘猶未償徒抱葵藿性久致杞菊
荒此味舊所識如客始還鄉乃知貧賤交到老取難
忘

送秋日作

志士常悲秋秋歸悲更深四時相代謝俛仰成古今
愴矣牛山景悽絕雍門琴君子貴知命素履良所欽
寒花殿衆馥危葉守故林莫愁霜雪至葆此百年心

暮春同從姪教永及鄰老數人遊南川以綠陰
幽州分韻得幽字

會心不在多出門溪水流散策尋荒榛得此西小邱
岩花吐餘馥汀草弄新柔鳬鷺乍回翔龜魚競沈浮
披衣惠風集藉地輕陰留飲和神自適玩芳意轉幽
眷茲時物變感彼年光逝川無緩瀨頽景不停輶
歎衰諒未達惜徃宜自謀惟當對美酒一酌寬千憂
尹郎士聞庭一有志于學書此勉之

百年難再得日月跳躐九膠擾利與名誰復放眼看
愛君英竅質氣味如春蘭頗能嗜墳素誓不負儒冠

千里肯相訪歲暮風雪寒山窓共伊吾孤燈耿夜闌
愧我頭今白久懷集木歎猶將一勺蠡妄測滄海觀
煌煌六經中有此天地寬至樂諒斯在外誘寧足干
况生洛閩後萬理析毫端游夏所異聞我幸得其完
苟能志正鵠舍矢良非難如行九軌涂六轡鳴和鸞
願言惜芳齡努力筆硯鑽佩服先聖訓要求心所安
會見北溟魚直上扶搖搏

哀途殍

春風定何物浩蕩不可名陽和鼓羣動所遇皆發生
窮壑雪漸消平原艸已萌林巒改舊容禽鳥有新聲

萬類欣自得見此天地情念彼溝中瘠獨非同胞民
黃壤莫肯受白日尚遺明乃知位育功始自南畝耕
堯湯豈不仁兩暘猶隔并安得調元和枯槁亦敷榮

題郭胤伯八分墨刻帖

胤伯名宗昌莘州人崇禎間諸生

結髮頗嗜古奇字學三蒼禹碑傳岫嶠周鼓自陳倉
寶鼎訝沈淪凡羽知文章旁流及分隸金薤堆琳琅
神品數孔廟逸跡搜郃陽論漢隸者以韓勅造孔廟禮器碑為神品曹全碑萬
曆中得之爰逮黃初際典刑猶未亡魏受禪大饗等
仰陽地中尚意古人出自自然規矩合圓方每於樸拙處工妙不
可量後世趨媚麗體勢殊漢唐字畫雖小道鑑別在

毫芒晴窓試柔翰間坐檢蠹箱粲然數幅書咫尺騰

輝光細搨蟬翅薄纖波隼尾長刊落開元肉咄之逼

中郎摩挲眼忽明名姓辨郭香漢西嶽華山碑遣書佐新豐郭香察書

昔讀蒙叟詩二士盛推揚錢謙益詩閑中及古有淹二士郭髯趙岷俱嵯峨

雅松談史辛勤石墨莊郭所居有松談閣著金石史二卷趙著石墨鐫華八卷俱

傳于世觀其所論述歐趙可鴈行真賞得神解臨摹亦

精良此紙五百年那不敵圭璋嘗聞漢六經鏤石立

鑿堂零落鄱陽刻寂寥東觀藏漢熹平石經殘字見宋黃長睿東觀餘論

及洪造隸釋洪又重鐫于蓬萊閣與今經典多有異字誰能復書丹萬世垂煌

煌髯芳骨亦朽筆法徒渺茫抱卷三歎息題詩索枯

腸

詩七言古詩

樓院道中遇大風雨暮至金谷仍成長句

萬丈峰前日欲曛
羸驂短僕愁行路
殷雷動地風怒號
黯淡不辨樓院樹
當頭雲葉似潑墨
龍公手決銀河注
森如萬弩共激射
驟若陣雲爭奔赴
少焉勢過奔漸收
晷暉更自遙岑吐
村墟四望靜人烟
木末時聞飛瀑布
黃茅一笠映谷口
崩橋絕壑紛回互
楓林岸幘鮮煩襟
醉顏猶滴松間露
晦明變化在須臾
翠嶂丹崖宛如故
眼前世事徒紛紛
覆雨翻雲那足數

有客見余墨詩贈以湖筆十枚求詩甚勤戲作
以謝

詩不能窺鮑謝境畫生暴富真天幸
隄麋瓦玉初獻琛中山諸毛爭脫穎
斐几清畫絕纖塵研磨揮灑如有神
長槍大劍竟安用蒼壁玄圭匪所珍
故人投贈意彌重寄報瓊琚仍接踵
如魚出膏以自焚墨已成池筆成塚
請君且莫索高價我豈因人求熟者
黃公墩下好林泉掉袂歸營茅一把
自是識字耕田夫葦管竈煤亦可畫
固知破硯磨不出且操耒耜治新畬
寒林雙雀啣戲為李懋官作

懋官博學工詩素不曉畫偶得精楮佳墨畫
寒林雉雀妙有生趣余題范石湖詩羣雀歲
寒保聚兩鶉日晏忘歸草間豈無餘粒刮地
風號雪飛語之曰羣雀能保聚安穩兩鶉則
鹿、營食於風雪之中至日晏而忘其歸盖
喻貪得而不知止士君子寧為雀之保聚無
為鶉之忘歸懋官歎其興寄深切余乃作此
歌以證它日偕隱之約若因此而遂謂懋官
真能工畫則非知懋官者也

海東畫家幾名氏我欲續撰南宮史前有金湜後李

澄花竹翎毛稱絕技寫生佳處識者稀紛々院體徒
為爾誰能畫此野田黃眼前突兀東鄰李乃知詩人
即畫師偶然遊戲前身是日本名紙鷄子滑高麗貢
墨鴉光紫明窓點染入三昧忽見雙雀毫端起正翹
側刷態各殊宛若飛鳴秋樹裡君看此畫豈是西酒
氣畫香流十指莫將風格比徐熙肯教題品煩李廌
我今說詩能解頤古人寄托多深旨况子偕隱宿約
存張南周北差可擬安得相從窺妙訣携手他年卧
田里爾雅經外注蟲魚農作畝中把耒耜王維有
農作畝鷄
鷄一枝足自安歲暮天寒知所止寄與沙鷗尋舊盟

時當作春

洞陰春色迷素梓

雨中和懋官見寄之作

時天漠漠雲四起卧聽檐溜鳴不止故人貽我雨中
詩夢想江湖自此始來詩有莞爾江湖思之句聞說三洲新漲生
綠波青嶂如鏡裡柳絮時節河豚肥櫻花落後時魚
美浮家泛宅亦復佳為買扁舟小於履茶竈筆牀載
篷底起居飲食具妙理平分身世寄釣徒笑看萬事
齊一指菰烟蘆雨渺茫間來徃中流興何已誰為襲
美誰魯望不須更辨吾與爾我今題詩作左券何處
無此數篙水

送李懋官隨蕉齋沈丈念祖入燕

李生三韓之布衣讀書十年人不識
閉戶孤吟茅屋底出無車馬家四壁
獨有豪氣溢九州每思壯觀凌八極
沈侯賢者能愛士一日西遊天借力
君不聞新羅賓貢崔侍御少年去應
淮南辟又不聞高麗宰相李仲思久
作燕山幕府客桂花詞賦至今傳
櫟翁詩律元無敵曹張朱趙盡勝流
吳越岷峨遍奇跡我謂諸公亦偶爾
生不逢時更可惜崔為高駢從事集中詩多與碩雲張喬曹
松諸人相唱酬李從忠宣王入燕所與遊者如姚燧
禍復元明善趙孟頫朱德潤輩皆一時名士二公又
嘗遍遊吳蜀東國文人周覽天下者無如二公然今
崔則值唐末造李則身際胡元俱非盛世事也

朝別君漢陽城杏花將落桐花圻戎衣羶笠搜急裝
白面走向金臺側春風舟楫馬訾水笑指衣帶裂區
域左臨渤澥覆坳堂右挹巫閭堆卷石幽營自古是
邊隅 文皇定鼎非長策遂令神州易陸沈遽看銅
駝立荆棘易水長城一局碁眼中翻愁四海窄回首
蒼梧叫虞舜欲醒天醉那由得不見遺民顧魏輩武魏禧明末遺民之傑然者悲歌誰與開
腦臆請君且莫笑古人後人視君今猶昔嗚呼丈夫不得志四方早歸來南
山之南北山北

仲牧寄示除夕詩自傷其孤苦詞意甚悲讀之

潜然遂書此以慰

昨日思君坐夜闌
今朝見詩摧心肝
莫道天翁於汝薄
有兄如吾差不惡
人生五十已過半
來者詎堪長把玩
削平幽憂付盃酒
從此相逢開笑口

歎落花

皇天布陽和
百花皆含胎
東園桃李矜顏色
倚賴春風競先開
忽聞昨夜雨
群急驚紅積
素被青苔餘香委地誰復惜
雌蝶雄蜂亦不來
獨有看花叟
笑撫孤松雪
滿首年々歲々
幾春光但願長對樽
中酒人生得意且莫誇
君不見樹頭花

聳齋從叔青以李丹陵胤永虛亭秋瀑圖見

贈作歌奉謝

大斧小斧蒼崖劈中有一道飛泉直楓樹蕭森中閣
寒瀾千四圍明秋色畫松畫石豈無意不著人物真

遊戲借問作此者為誰丹陵處士今清閼倪雲林作山水小景

多不盡人物所居有清閼閣丹陵山水四郡東一夢曾向仇池通

千嶂萬壑水精域海嶽研山兒孫同丹陵嘗夢丹陽山水盡化為水

精曰名其居幻境因與畫境遇指頭颯沓烟雲赴荆

關董巨且莫論落筆要寫胸中趣吾宗好事世無兩

贈我此卷當清賞不見當時盤礴人尺地空勞名山

清閼作真

想桃花自發水自流武陵本非神仙儔
它年擬着幾兩屐畫中亭子無恙不

誠之書屋見家藏古琴感作長句

琴為先祖靖孝公所藏手書一詩于其腹曰
王翰松風迴金徽竹露侵莫令彈古調去路
少知音墨光至今鮮新

緯蕭堂上秋日淨圖書四壁相輝映就中一物眼最
明十指摩挲感淚迸河間禮樂去所賢文采風流尚
可傳秘蹟題籤分甲乙賜書插架盈三千工師斲琴
三尺強王翰金徽爛生光妙製不肯讓雷氏異材豈

一
下
有
字

必待中郎窈窕池臺北山畔翠虬蟠屈朱華攢靖孝公陽

德坊舊第庭有古松盤屈可愛鑿小一曲猗蘭手自

彈月下時聞孤鳳嘯當時撫弄定有思高山流水聽

者誰通來人事重堪嘆詎識昭文有成虧舊物飄零

在山村百年手澤今猶存檀槽黯淡飛尘集朱絃寂

寞清音吞吁嗟汝曹忝厥裔服襲先訓承嘉惠傳家

忠孝幸勿替一琴那足論人古故里素梓聚群族有

兒分授一經讀出事明君退力田豈弟應為神所

福物亦與人相始終永保用之貽無窮小子述德繼

遺什歌罷謾來松風

三釜瀑布歌示同遊兩弟

瀑布在龍華山口上有三洲金公遺址

君不見三洲翁白頭遯跡華山中
胸裡青霞鬱奇氣
始信文章窮乃工
又不見三釜瀑天造地設輸全功
難崖中圻巨靈掌削成翠壁蟠蒼穹
峽水奔崩不可禦
飛流倒瀉垂長虹
鯨魚噴雪海濤立蛟龍掛雨雲
氣濛下為深潭渟黛綠四顧蕭颯生寒風
我來看瀑携二弟清秋路入東州東
石門下馬將落日霜林的
歷明丹楓倚醉放歌才力薄欲繼高風
嗟道窮安得
淵翁長在在
追隨杖屨閒
愚蒙吁嗟乎
淵翁不作吾
已矣三釜之瀑何其雄

雪後獨酌戲邀仲牧

朝日瞳矐快雪晴滿園
草木生光晶寒梅皎潔
終吐萼凍竹踈瘦猶作
群却愛長身兩松樹偃
蹇玉立誰敢爭梅妻竹
君吾臭味况有髯朋同
志氣閉戶僵卧莫相嘲
得此嘉賓差可慰麴生
風致在逸群勸我細酌
顏微醺自笑筆態漸豪
放始覺書香稍氤氲此
中有趣愧獨享火急題
詩報叩君

春日陪判官族叔素看
花曹園同遊者德柔叔
典族弟誠父行九及吳
士惇叙常士默淵常分
韵各賦得山字

酒無賢聖皆堪醉詩如曹鄴不須刪十載看花雲臺
下舊時年少非朱顏竹林步兵眼長白舉杯兀當
青山二妙文米連雙壁落筆箇鳴瑤環封胡過末
亦競爽麈尾橫斜松石間欲雨不雨春陰薄西峰落
日近可攀人生未宜輕今夕我且長歌君勿還過眼
韶光一飛鳥餉此四美天所慳曹家園裡花滿樹主
人出去花自閒昨日臘脂今日雪重來應笑髣毛斑

題林生水禽圖

一鷺高飛不相待一鷺將飛意已改身閒心苦莫漫
猜水涵天空任自在洲渚蕭寒夕照合鷓鴣鵲鵲紛

來集蘋葉浮青蓼花紅付與汝曹恣啜喋林生作畫
有餘旨眼前忽此秋水鷺兮鷺兮且莫飛黃鵠一
舉當千里

柳君來問疾因誦近作次韵以謝

病夫全忘人古事空餘拄腹好文字閉門獨卧梅樹
前肯許俗物來敗意四十頭顱處如許間人祇合間
處置長安米貴豈足憂餐_經酌史居亦易官是鹿材
尚不堪詎敢復夢三刀刺但得如君數相過不學鄭
莊勞驛騎

大關嶺望見海上雷雨

碧海磨出青銅鏡炫晃落照迷眼花俯視長風驅急
雨半空明滅玄雲遮兒啼隱鱗響疊鼓天笑閃爍飛
金蛇老龍起舞弄鱗鬣巨鯨奮擲搖鬚牙水神海恠
競奔走銀濤湧洞無畔涯物性變化誰能測天意蒼
茫祇可嗟我來坐土今幾歲青髯朱顏減韶華偶向
蓬瀛窮出日綠章飛奏虛皇家先遣陽侯清大道催
檄群仙排早衙絳節霓幢擁瑞靄珠宮貝闕開晨霞
若不親乘槎高鯉定應直泛張騫槎回笑人寰烟霧
裡一枕黃粱日正斜

觀日出

海萬里天四垂黃道開火輪馳霞絢爛雲陸雉百神
衛群靈隨駕蒼龍導赤螭羲暨和執兩綏行蛻二若
有期轉上虛空曾不疑自從天宇始青歲杜甫雜文云石鼈老
放神于始青之天幾回來往誰能知小兒夸父不量力汗流
赤脚猶相追陽烏三足果安用可以棲息扶桑枝胡
為跋二逐頽兔出入海底無休時願爾從今飛且止
中天瑞旭舒而遲獻我君王萬歲壽太平民物長
熙熙

暮至蔚珍徐姓人家

枳實青黃照籬落山家日暮噪寒雀屋後橡林始收

栗崖底蜂房新割藥

嶺東人謂橡實曰栗蜂蜜曰藥

老人耕鑿在深

村十年足不到縣門却有兒孫能識字已看滿壁塗

鷓鴣痕

九月十四日聞量移砥平行至十二嶺忽憶前
年是日自寧邊入香山暮宿新興館感成長句

去年足躡烟霞窟新興館裡看明月今年匹馬走嶺
東野店又見黃花發黃花隨處自顏色明月照人無
南北我將何物荅秋光惟有白髮難拋得人生一落
小海左是日即余生朝北史百濟西有小海百年意氣真困挫青鞵布
襪遍域中猶是區區蟻旋磨况復光陰日奔馳歎忽

蒼狗變白衣但教雙丸黏空在不辭孤蓬逐風飛先生此言亦遊戲對月看花諒未易莫問地角與天涯且向前村謀一醉

新羅金生白月樓雲碑歌贈榮川沈侯喜永

金生筆法古所無當時擅名凌歐虞崇寧待詔鑑賞

殊右軍真蹟空驚吁

金富軾三國史崇寧中高麗使洪灌以金生書示翰林待詔楊

球李革二人驚歎以為王右軍真蹟

栖雲舊榻入畫厨屋漏折釵森步

趨惜哉硬黃妄翻模神韵少失餘筋膚

此碑為周顯德五年摹刻

復有昌林稱並驅吳興激歎應不誣

趙文敏跋金生昌林寺碑云雖

唐人名刻即今消滅雲烟俱歸然片石薶榛蕪何人

好事類竊附瓊裏牛曳煩百夫浚來肉眼真庸奴辱

以搜勃良非辜

昌林碑已亡此碑旧在奉化縣有人曳置郡解求揭者曰衆後守苦之斥

為馬

蹄痕者為旧榻

沈侯六十白鬚鬚為郡暮歲浦

還珠旅舍清秋挈觴壺坐談故事仍胡盧嗟我嗜古

歐趙徒要持鉄網收珊瑚細思物理堪嗚呼誰將定

價分鎚銖進或堂皇退泥塗好惡變搜如轉樞勸君

收弄亦太愚

余勸侯收碑入官庫

更須相對傾美醕

得鄭文詹

東規

書詩以謝之

礪紙瑩明雪色膚中有細字如穿珠故人遙在城南
隅问我謫居平安無自言前秋使西都須上游宴多

歡娛練光綠波照美姝降仙明月流金壺江山到處

一踟躕追尋古跡同搜逋殷田誰復辨井區漢鏡久

已墜泥塗

平壤為漢樂浪郡治萬曆中闕地得古鏡月沙李公謂東明王時物余嘗考銘文定

為漢尚方鑑

作書纖悉寄老夫要使髯秦見醉蘇憶

昔禁林聚群儒君時少年風骨殊

余與文詹同為甲辰選講製文官

竭來徐步上雲衢繁若明堂登璉瑚日騎天閑龍馬

駒玉輿琤瓏纓垂朱

聞文詹拜僕正

頌我久作澤畔枯天寒

破屋時擁鑪揩摩病眼誦唐虞

余在謫讀尚書

蒐羅箋注爬

荒蕪人生少壯在須更有書不讀胡為乎即今霜雪

滿頭鬚敦詩說禮非良圖蠶縛春繭亦太迂蜂鑽故

紙何其愚知君博學古為徒此日可惜須看吾宦遊
雖好亦畏途不如安坐治典謨况復家世出公孤美
材終為廊廟需遙持報章當盤盂歲暮襟期應不渝

啼鳥

茆屋春深花木香戶牖靜妙延朝光林鳥侶嗔人晏
起百種弄舌弄悠揚鳩能噉兩最可厭鵲雖報喜終
未詳羣雀窺檐若有訴雙燕營巢爾許忙嘈々呢々
竟何謂天籟互發諧宮商我與沙鷗負盟約眼見野
鷗來坐傍知音不是介葛盧遭厄真同公冶長渠因
樂意語自好我有愁心聽還傷君不見孤竹岡頭馬

上郎鷓鴣一弄空斷腸春泥滑々行不得猶勝終年
在他鄉

三月四日聞量移揚州翌曉冒雨發行暮宿平
邱驛復用前秋蔚琬韻

我有征輪四角出旅舍六見龍門月幾日天晴不肯
行今朝有雨仍催發丈夫平生須自識如把盤針定
南北何為汨々在泥塗去住隨人挽不得繭絲每逐
縑車左駒步苦被長轅挫一身漂轉江海間秋徃春
來驢踏磨却憶家鄉舊釣磯細雨斜風一蓑衣如此
溪山不歸去沙鳥見我還驚飛人生百年少如意未

老得閒尤未易可笑揚朱泣路歧莫學靈均問醒醉

題茆屋春深圖

霏紅疊雪花千樹乳燕鳴鳩春日午茆齋低小牕滿
庭而翁相對誰是主世間何處無青山人生乃有如
此閒九陌繁華易銷歇不如長向圖中看

明趙忠毅公鉞如意歌

繡花細澁銀鈿古瓦錯劫火經風雨珍重名字趙南
星我来泣向燈前撫憶曾皇家事轉非 熹宗天子
臨區宇至尊還豎小兒屋遽使刑餘主門戶蟒袍玉
帶彼何人五虎五彪方虓怒尚畫矯々雲中龍高標

屹然頽波柱海內爭推仲舉賢床下不受梁松侮有
鐵堅如忠臣志持作譚柄正氣吐邊城日落秋風起
吳歌卞闕仍楚舞悲來欲上高臺擊醉後應將缺壺
鼓手中堪比司農笏小墻不足腥碓斧我一想之歎
眦裂百載尚可風拜樹素海淒涼物獨存亦有詞人
傳樂府近人詩選有作
公如意歌者胡為淪落大海東應厭腥塵
染九土鉤黨禍國啓寇戎遺民故老心同腐樓頭葉
墮兩響踈吊公且復蒟新酤嗚呼安得如此百鍊剛
世間脂韋那可數

詩五言律詩

出漢北門尋僧伽寺

一迳緣雲上春山望轉深時聞何寺磬獨在數峯陰
過雨添新磳幽花落半林微茫臨下界已足淨坐心

北漢山城

拔地三峯碧晴光遍數州雲中山抱郭花外水鳴樓
拱衛神京壯莊嚴佛界幽得茲林壑美幸不負春遊

聞生子

長兒建吉癸巳十二月三日
生于會賢坊外氏第後殤

麒麟天上送生汝定佳兒自媿能為父翻思克肖誰
懸弧方此日鼓篋仔他時不願簞簞金滿經書尚可貽

聞蜚用杜韵

哀吟緣底事，遙夜有愁人。
乍入詩邊苦，偏歸夢境親。
霜風時下葉，孤月煇將晨。
何物非秋意，勞形爾獨真。

春望

春園時縱目，紅綠自相扶。
樹外山光衆，花間塔影孤。
片雲當晝在，高鳥入空無。
晚向西臺上，還須倒酒壺。

夏日同仲牧

幽栖甘寂寞，祇愛北窓風。
竹密牆陰冷，苔深院色空。
花飛殘夢後，晝永小詩中。
賴此消煩暑，閒情與子同。

訪友人東郊別業二首

喜雨幽栖地，諧吾獨往思。
偶同流水到，因與白雲期。

松籟吟風細山光度雨遲東家如可問
琴酒會相隨
過橋先入空門柳是陶家長日棊
琴靜微風釣影斜
麥深交翠浪荷淨吐朱華
為近城東路貧居且種瓜

秋日過玉流堂

細路穿霜葉孤亭接磴楓
軒窓開晚照鞍馬及秋風
樹韻憑虛冷溪光到底紅
欲看山月上徙倚石橋東
鳳麓金丈履坤之任新溪以詩藁見寄作詩奉

謝

今時陸浚儀文米世應知老去方為郡
公餘尚愛詩
遙將金藁托多愧後生痴却憶封緘日
官梅正滿枝

春早

樹末鳴禽亂人家暮雨踈春風如故友今日到幽居
花意紅全動苔痕碧漸舒韶光將滿眼莫遣酒罇虛
送朴丈美仲趾源歸燕巖

之子懷長往全家住碧峯名高還避世身老且為農
自笑聖俞鳳誰嗟東野龍髯霜看未滿應作後凋松
驟晴

驟晴終不快餘意在遙天雙曉翻枝鵲孤吟抱葉蟬
落霞明倒景濕地赴輕烟幸有雲間月畝看此夜妍

夜聞風雨

浙瀝風兼雨年光一鳥過
睡從秋後減愁入夜來多
古事看高枕心期付短歌
唯聞窓外響撩亂半池荷
奉題近菴金丈尚默陶山寓廬

夫子金閨彥胡為畎畝間
長懷明主戀聊共野人
閒閉戶春泉響彈琴夜月
彎謝公非遯世能復卧東
山

金丈盛說斗湖之勝將欲移居
勸余同鄰

見說移居地雲山滿上游
朱陳餘舊俗苔雪有扁舟
喬木村邊合長江舍下流
會當操几杖卜筭近清幽

久雨

雨入江波漲雲垂野岸低
俄看孤嶼沒轉覺近村迷
苔壁蝸成字茅檐燕墮泥
終知有晴霽愁絕此羈栖

晚晴

夕虹能截雨遙岫返斜陽
高浪奔猶急歸雲意獨長
樓臺收暑氣樹木動清光
便有群鷗戲平沙炯一行

樓月

夜深風露寂涼月滿高樓
沙白疑先曙江明已近秋
婣娟真可愛寥落自生愁
獨立冰壺裡謾誰與共甬

送林龍川配戍歸鄉

且盡離亭酒颯然江上秋
西風送歸客今夜向驪州

行處山迎擢吟時月滿舟知君富經術叢桂莫淹留
江樓早起寄驪上故人

客枕晨光動高樓水氣涼早潮隨月白秋樹出村黃
避地江湖闊懷人道路長扁舟空在眼直欲泛滄浪
洞陰山居與鄰翁共吟二首

每觀陶令集神會在南村幸有歸耕地因開日涉園
林泉知信美文字共誰論野老頗相問忻然對瓦盆
幽事日成趣愛茲岩壑居掃苔看碣碣披竹過田廬
醉後時爭席間來自著書頗能諧宿願晨夕莫相踈

宿白雲寺二首

有僧知緝者年八十餘
自言少從三洲金公遊

寺從前代久客到上方幽不記松杉老時逢鹿豕遊
泉聲生衆壑山色滿虛樓趺坐看人世菴僧自白頭
合沓楓林色幽尋迳轉迷度橋聞磬響入谷趣禽栖
古塔雲常宿禪房月正低佳廬期結社興到輒扶藜

思菴朴公墓

廊廟高名在林泉晚跡奇江風流迴籟松月偃幽姿
尚識宗臣像空傳有道碑春山聞百鳥猶侶拜鵲時

李君歸後夜坐有作

明月自佳色念君行路難山川征馬迴風雪弊貂寒
別酒餘前醉窓梅許獨看為憐舊賓客惟有一任安

山居喜叔典至

朝日照茅棟山風開竹扉
展書松鼠落隱几水禽飛
正喜幽情愜那堪好友稀
愛君如海燕偏逐社前歸
新晴出漢北門

舒卷多新態層峯半是雲
野橋春雨過谿寺夕陽分
花氣因風至松聲並瀑聞
誰云城市近特地背囂紛

同仲牧陪嘯齋金丈及李京山

漢鎮

遊大隱岩

林壑誰為主題詩憶翠翁
名隨流水盡事與碧山空
花繁春光晚琴尊暇日同
相看松石意抱膝礧群中

題圓嶠翁

庶從祖
彦休

新舍

窮巷少人跡柴門秋樹邊歲寒猶布褐日午始厨烟
自以貧為樂深知靜者便蕭然山澤氣應作老矐仙

蒼玉屏訪李叅奉和甫

磴路通冰雪行尋隱士廬窮經忘世慮盡室寄漁樵
泉老淵源在思翁杖屨餘襄陽耆舊傳誰復續新書
奉和鄭叔子華存實有詩見寄

平生耕破硯華聞藉京師絳帳三年學黃陵七字詩
田園宿契書札慰離思相得非今日濠梁恨未隨

春日山居二首

常慕羣賢跡幽居在洞陰燒畬白雲晚採藥碧山深

偶有明農志因成遜世心高風那敢繼祇愛卧中林
小雨催春事山村始百功獲人栽屋後魚子種池中
耒耜家々出泉流處々通本無遺後計聊自學龐公

養病

養病仍習靜祇可作潛夫長日宜書卷殘生付藥鑪
朋侪求仲迕身入輞川畝詎敢輕軒冕稱量向幾銖

早起

碣寒收曉霧山淨絕浮埃空翠紛如積清華湛未開
邨墟皆畫境樵牧盡仙材獨入看踈影池邊半樹梅

晚坐

山窓生暮色西日翳林邱樵唱遙相應泉聲靜自流
雪枝低睡雀烟迳澹歸牛物外心常寂聊為耳目謀

過東村民家

人家深峽裏柵托隔塵氛園樹逢春接鄰蜂揀日分
禽虫當眷屬花草榮功勲莫道生涯拙幽情讓與君
題誠之華峴新居

求點思偕隱光黃見異人雲中新井曰林下古衣巾
山鼠時相對沙鷗日漸親喜君成小筭遲我買同鄰
過金丈聖規光陵齋室

夾路松杉靜高齋晝欲陰官閒宜老疾地肅屏坐心

暮壑禽群恠春泥虎跡深應煩呵護力鐘梵有清音

秋夜讀書懷仲牧

掩卷新愁至寒宵又苦遲數蛩喧暗壁一葉響高枝
自酌燈前酒仍成枕上詩畏添秋後感不敢寄君知

斜川道中

漸識溪山好霜天入永州人家皆近水峽邑例先秋
數騎穿紅葉建禽弄碧流清暉紛在眼搖落易為愁

春夜喜仲牧來宿誠之亦自鄉至

久別嗟經歲分居未卜鄰多情今夜話相對所思人
樓為延明月花猶駐晚春芳華終一夢杯酒莫辭頻

庭梅盡落悵然有作

清高元絕世零落太無端枉費番風力能成幾日看
餘香留碧砌飛盡點朱欄幸結枝頭子孤根到地蟠

愛松

先大夫
手植

最愛瘦松樹清陰滿小園移栽今已久遺澤物猶存
葆晚看高節昂霄有直根會當支大厦留待百年論

春晚

園林春欲晚杖屨日常閒偶向松前立遙看郭外山
鳥啼應有意花笑獨開顏竹裡通幽徑鄰朋自往還

病眼二首

萬事從吾好相親有簡編難瞳便作苦孤坐侶叅禪
返照虛生白疑思妙入玄方知樗櫟壽終以不才全
風雨驚殘夢晨朝枕席清園花應盡落庭艸幾多生
乍捲綳簾薄微分紙牖明卧聞林鳥語知是悅新晴

宿宜齋族叔翼楊山寓廬

斗酒楊山夜孤燈旅舍秋狂歌仍忝澤吾道已滄洲
貧豈妻兒戀窮猶社稷憂不須稱曠達且作竹林遊
樓院道中

四野皆秋色征驂趁早涼川涂收積氣禾黍待新霜
堤柳殘蟬噪畦花晚蝶揚田園多樂事吾亦水雲鄉

送宗人彥燮之全州無呈通判族叔

老大常為客嗟君又此行貧居忘外累長醉了浮生
去路春將晚官樓月正明遙知賢地主青眼笑相迎
春日邀諸朋小飲

早雨羣芳秀方春衆木嘉高齋留好客永日賞新花
琴奏松風靜詩成竹影斜寧辭金谷罰爛醉是生涯
夏日會北營池亭

白袷乘涼處紅亭對酒時繁陰通曲徑疎雨點清池
樹密黃鸝語萍開翠鳥窺悠然濠濮想遂與故人期
雨後北城水亭

若為消夏日出郭事幽尋積雨開新景歸雲解晚陰
水流鳴更急松翠濕逾深矯首青山好長懷獨徃心

惕齋集卷之二

惕齋集卷之三

詩五言律詩

冬日同仲牧

託身書卷內林屋有餘清
樹影依欄直山光分戶明
好詩言外得真意醉中生
昆季相逢處偏憐歲暮情
拜官志感

聖世無遺棄除書下側微
浮名還自誤素計却全非
才拙君恩重言深友道稀
獨憐秋後菊心事不相違

秋夜書懷

時讀東坡易傳又與客談嘉陵山水

讀易差嘗早名山久未尋祇堪招隱士能復傳儒林
夜雨孤蛩急秋燈積葉深數莖頭上雪先識此間心

送金君還定州

千里鄉山隔三年旅館栖秋并生漢口歸夢滿關西
白首功名薄紅塵道路迷爭如茅屋裡細酌對荆妻

春塘紀事

宸心眷嘉節良讌屬重陽瑞日方躔火寒飈正叩商
連雲排鳳仗凌晚集鴈行苑樹侵袍赤宮花映帽黃
橫經陪法講摘翰和天章仙廐頒文駟華筵奉壽觴
觴丁年符盛運甲觀迓新祥聖道叅經緯治謨在

弛張獻詩周早麓作賦漢長楊猥載詞垣筆樂裁庶
事康

奉 旨按廉嶺右早渡漢江

直指承新 命建星動暗文江舡凌曉霧嶺路入春
雲列郡民生困荒年 聖念勤持心比清漢將以獻
吾君

統營洗兵館懷李忠武公二首

海國關防險樓舡節制雄旌旗明曉日鼓角動春風
罷錫仍開府威名舊摠戎至今朱鳥外猶說伏波功

公禦倭屢捷 皇朝賜銅關防鬼刀曲
柄銑令牌各一令旗二面今尚留營中

世亂英才出如公更逸羣七年成保障一死報明

君雄釵收星彩靈旗閃海雲遺祠迎送曲重吊鄧將

軍

露梁之役鄧掩兵于龍興公同時戰死皇朝命立祠本國而露梁之祠鄧公獨未膾享是為闕典

哀金吏四首

金吏慶宅之從余南行也辭以親老余強與之俱中途馬蹊徒步行累百里至昌原而病余歸到高靈忽聞昌原吏有報噫慶宅死矣使慶宅至於斯者果誰歟今其柩來自嶺外將葬于黔川故山其弟來告余遂題四詩以塞其悲時丁未八月廿六日

生材非擇地貧賤識人難自有疎狂態寧將小吏看
問詩花院靜詠史雪窓寒回首皆陳跡渾如午夢殘
繡斧初行縣駟馳許共隨祗緣王事急真慰旅心
悲海驛相分日江樓獨上時春風無限意悵悵竟誰
知

惻愴昌原報迢迢洛水濱豈知同去路終作未歸人
霧露仍成疾崎嶇敢愛身浮生均逆旅此別最傷神
海天收積潦孤櫬返南州長道魂應恟殊方節已遒
死生妻子隔原隰弟兄求百感秋偏集吾衰已白頭

顯隆園遷奉輓詞五首

文考垂衣日

儲闈一德馨顯承光

社稷慈孝藹

宮庭

睿思無群聖微言似六經

曩日窺秘牒感激

涕長零

上親撰園誌賤臣承命鈔進政院春坊日記

左海重華聖謳歌十四年

冲岭初出震丕責已行

乾惠澤覃黎庶仁拜暨幅員中天方繼照短馭倏虞

淵

大德猗昌後餘庥式在今鞏基由積厚率土荷恩深
寶冊揚鴻烈朱絃薦雅音萬年詒燕志於赫帝傍臨
灤水幽宮啓喬山吉兆營省方曾此地過化尚遺氓
邑以輿情徙資徙內府傾深仁垂沒世善述即宸

誠

羽衛寒天警神京指顧遙江山猶宿昔弓劍又今朝
望野空悲舜攀雲更見堯珠邱新象設冥祐在宗
桃

六勝亭月夜

水淨偏宜夜亭虛易覺秋小橋烟景澹森木月華幽
未作陶潛賦翻為宋玉愁踈狂猶故態聊向習池遊
藥山秋望

孤城吹盡角秋色轉蒼茫落日依山赤寒雲入塞黃
地形窮渤碣人事問隋唐短髮西風外登臨意獨長

郡齋九月

秋事今搖落，遑城木葉黃。
繁砧催晚景，哀角動清霜。
病起驚佳節，愁多覺異鄉。
菊花知我意，相對作重陽。

橫溪道中

一逕穿黃葉，千峰展畫屏。
危橋連復斷，幽磴瀉還停。
霜重松身白，嵐寒石氣青。
平生邱壑想，便欲結茅亭。

九日江陵道中

不負登高節，行人大嶺間。
丹青霜後樹，金碧海中山。
漭蕩身如寄，飄零鬢欲斑。
晴空數行鴈，應自日邊還。
重陽非世態，相送路岐間。
好作三秋色，同看九郡山。

店酤猶可醉野菊亦能斑
乞與明年約鄉園待我還
到謫寓安氏庖園中脩竹成林喜而有作

瘴海誰青眼相逢有此君
幸茲能療俗不復歎離羣
冷翠翻西日斜梢拂晚雲
偏憐秋夜靜幽籟隔窓聞

丹陽道中

峽色長如此千山復萬山
鳥飛黃落外人在翠微間
過雨群何急孤雲意自閒
塵纓吾欲濯臨水媿蒼顏

曉發向堤川

遙山初辨色風露滿征裘
曙月雲俱淡寒烟水共流
林樵來谷口村汲聚橋頭
日出看羣動人生苦未休

園皋夕望

散策心全懶登高力漸非
溪雲低欲合林月暝還微
秋盡猶為客天寒苦憶歸
幽情隨地有悵悵歲華飛
冬初村暮二首

向晚村墟靜蒼涼獨眺時
砧聲來近舍
榘影出疎櫺
野曠牛羊細林寒鳥雀痴
秋花如久客相對兩低垂
漸看斜暉盡蒼山又掩扉
黃花霜後倒紅葉雨中飛
野客逢仍慣家書見稍稀
遙知諸弟在應復念寒衣
春日謫舍雜興同申生在祿八首

忽忘遷謫苦談笑一窓間
生意看芳艸孤懷對碧山

園林欣日永，鷄犬識春閒。
為爾開三迳，從今數往還。
異鄉生白髮，京國杳歸期。
到及鴻賓後，行看燕乳時。
衣添慈母淚，書慰病妻思。
更有池塘草，偏成夢裡詩。
羈旅多愁疾，郊原賞物華。
青山開縣舍，流水入田家。
夜雨新沾麥，春陰暗養花。
漢城西北望，天末數重霞。
野外無人事，衡門晝不開。
碧泉時洗硯，茅屋獨含杯。
擁特將雛卧，林鳩喚婦來。
新詩渾漫與，莫遣兩相催。
心閑身自健，詩就興猶餘。
室有仙人枕，門無長者車。
幽雲生壁面，暝翠落床書。
迥與塵凡隔，蕭然返太初。
聞君親已老，耕稼在邱園。
早歲能耽道，深居却避喧。

詩書常愛日花竹自成村
媿我栖々者幽懷許共論
見說黃驪好春來景最幽
先生有遺席退士卜名樓
野草迷歸夢江花動客愁
何時停短棹載酒入林邱
偶從占鵬地便欲擇鷗林
漁釣多閒侶桑麻愜素心
買田皆賴上放棹即山陰
似此堪終老何須動越吟

題辛生夏山小景

洞壑含蒼潤憺然林館清
道人看瀑坐孤鶴破苔行
草木有仙氣衣冠非俗情
煩君一回首山外火雲生

成秘書大中

應旨獻賦出守北青

命諸近臣

設餞賦詩以侈其行同徐令慶世榮輔用恩字

為贈

青藜燃漢閣白雪賦梁園臺署聲名久文章契遇存
分符臨絕塞罷餞集詞垣會見循良治能酬聖主
恩

寧海謫中贈李君

得淵

歸京二首

共作殊方客今朝又送君明時羞禦魅遲暮畏離羣
霜晚鴻先到風高葉正紛歸程從此去遙指萬峯雲
再見扶桑日東南信有緣相從嗟已久小別亦堪憐
異地稀新友衰顏變舊年祇應今夜月旅枕猶無眠
辛亥余謫蔚珍君亦從行今又相守百餘
日而歸東坡詩我緣在東南徃寄白髮餘

觀魚臺望海

萬水皆來注歸墟古所名氣涵天宇碧光洗日輪
明始覺吾身小翻疑大地輕冷風如可御直欲上瑤京
早發蒼水院踰西鬱嶺

嶺路多盤折藍輿且緩登宿雲藏壑暝初日上峯層
曠野孤鴻叫晴空一鶴昇歸心憑酒力千里共飛騰
金生鳴礪自定州至二首

此地寧期見荒城瘴海邊山關衝積雪野店趁孤烟
意氣輕千里交情見百年既逢竟何似相對却悠然
歲色今如許歸心水向東海山寒欲雪嶺樹晚多風

漸覺虞翻老堪悲阮籍窮非君能命駕此酒與誰同

贈別金生二首

金君鳴礪聞余謫寧海自定州策一驢走二
千里來見其意可感君性愛山水興至輒飄
然獨往足跡殆遍方內家居時花種樹以自
娛凡世間榮利嗜欲泊然無所求去歲余按
湖南君將復遊東南名山歷見余々助其行
橐亦辭不受其介如此其好遊如此然君年
四十餘且聞有兄年老亦非遊覽四方時也
始至也喜作二詩留數日告歸憫其風雪行

後之苦復贈二詩且以戒之時乙卯南至前
二日

須薩多奇士如君更不羈遊山應悟易見客輒求詩
浪跡雲同住清襟雪獨知幽居聞亦好慎莫負歸期
徃歲湖南送今冬海上來升沈嗟宦跡衰疾恹離杯
孤月隨身在微陽共客回異鄉無可贈為折一枝梅

恭賡

御製中和節頒尺詩

律度王猷本光華聖德重朽寧遺巨木蓬亦感洪
鐘枉直休相較方圓許並容裁成群品化高拱儼山
龍

恭賡 御製 皇冊展拜日命文正公尹焞不

祧詩

夫子尊王志吾東尚炳如義隆虞帝祀功大澹菴書
百世民彝正當時廟議踈天心憐直節培到歲寒餘

恭賡 御製春秋完讀日 慈宮設饌詩

丙辰冬 上命賤臣以春秋左氏傳依朱子
資治通鑑綱目例分經繫傳編校以進乙夜
講讀二旬而畢 慈宮設饌識喜是日特旨
臣曰此筵不可無卿既宣 御製命即席賡
韻時己未十二月八日

古來稀此讌盛事頌猗歟道緒宣尼後歡承壽母
餘萬年稱兕日一部獲書幸被需雲澤賡歌媿穆
如

健陵輓詞十首

誰道唐虞邈於吾見聖人範圍恢六合功化達三辰
蕩：難名德淵：不測神民生惟日用沒世更尊親
文王為世子寧考有神孫勤儉傳家法危微見道
原宏綱歸社稷神武整乾坤一掃陰氛廓爭瞻北極
尊

惻怛初元教千秋永有辭事親吾所盡匪聖孰能知

義闡精微蘊情緣品節宜洋々二紀化皆自孝思推
允矣治平學巍然闢廓功與天同不息如日正當中
六籍歸刪述群儒見會通軒義千載統今始在吾東
原泉流有本雲漢倬為章制作追三古群明振四方
遺音清廟瑟元氣太和湯隻字皆謨訓留傳萬世長
薄海安耕鑿宸憂尚惜陰林慈皆已分節屋若常
臨密勿經邦策汪洋濟物心功施猶未半遺恨竟如
今

大義明終始絲綸降十行皇猷思會極聖度示包荒
佇見民心定邦知末命揚萬年貽燕志繼述在今

王

鬱：安寧里我：光教山瞻依寓真像拱護壯重関
庶慰終身慕將期未老間傷心甘露樹不復覩親攀
實愧南金比虛紆華袞褒菲材誠眇未嘉會幸偏遭
黼座陪清讌明廷厠俊髦此恩那可再欲報昊天高
嚴宵紛羽衛仙寢啓灵期衣冠長密通鑾蹕昔逶迤
萬姓如喪痛孤臣未死悲雲鄉歸侍日倘得罄衷私

夕步

偶逢林叟語随意步江皋野色寒逾淨灘莽凍亦高
禽魚皆舊識風月屬吾曹即事成真趣何須賦楚騷

碧蹄懷古

尚憶東征日空悲古戰場平蕪橋路斷流水稻畦荒
壯士揮戈急將軍躍馬長蟲沙三萬甲春草綠茫茫

碧蹄之役天兵陷稻畦中因此失利提督馬遇橋而蹶麾下士李有昇力戰死賴楊元救兵至乃免

林居初夏三首

退士幽栖地素麻十畝園野畦挾葉細村迳草花繁
邱壑身堪寘文章道未尊已無車馬至何用掩柴門
散策林皋外結廬雲水傍偶然耽圃稼非是傲軒裳
踈雨松杉翠微風菡萏香不知魚所樂聊復在濠梁
野色宜高望臨流且置亭長川搖澹碧列岫送遙青

壇下逢漁父臺邊見客星黃公栖遯處能復續圖經
溪上有黃芝川
遺墟見邑乘

秋夜聞雨有懷故山二首

蕭蕭今夜雨催作滿城秋歸鴈鳴何急繁興語更愁
鄉山雲萬疊歲月水東流一枕滄洲夢盟寒奈白鷗
一涼遽如許秋事亦無多餘滴風翻葉微光月隱河
身名羞小草功業笑南柯遙憶雲山裡柴門掩薜蘿

涓上樓夕二首

已迫初冬候江城木葉丹檣移知水落砧急念村寒
故舊無書到鄉山入夢看宦遊漸老大非是厭鹿官

飛樓臨水郭登望更悠我暝岸燈初上空江雪欲來

沉吟遙夜角潦倒異鄉杯世事堪頭白休教鏡裡催

寄題金生

正中

一翁亭

生為余舊識居平壤外城能詩嘗隨使入燕

四十年前相逢鬢雪明江湖留一士詩卷送平生

燕市曾論劍殷田且耦耕東臯如可卜吾欲共藏名

崔簡易坐嘗寓居頂上自号東臯今有遺址

池亭銷夏

虛閣宜朱夏危欄俯綠池林風開鏡匣山雨拂琴絲

細溜鳴何已高雲動不知潛鱗真可羨休把釣竿垂

遊卧龍岩

谷口春尚在雲木鎖千重茅屋東西礪晴嵐八九峯
溪喧空自語花靜為誰容終古蒿萊地無人識卧龍

晚望

落日蟬聲急前山雨氣深濛濛原樹色漠漠野田陰
鶴鶴飛仍倦牛羊逐自尋荷鋤人未返忘却夕烟沈
村暮

山中易為夕茅屋隱松林籬落生秋氣素麻翳晚陰
漁婦橋月細農語巷烟深似與新涼約繁蟲遍地吟
久雨

澹日光初漏微雲晚復生松林綠變色荷葉已踈羣

野屐衝泥滑溪舡掠岸輕秋原禾黍熟收割待新晴
教侄登東峯而歸有詩次韵

孺底看飛鳥中峯勢最高白雲通石棧黃葉覆林皋
不有躋攀苦那令眺望豪衰年腰脚倦跌宕任渠曹
哭澹圃

末路知心少重泉送子歸瑶琴絃已絕夜屋月空輝
白髮均榮辱青山任是非淒涼留訣語衰淚謾沾衣

謝世前一日手書
告訣字畫如平昔

次韵趙醫喜晴

雨歇殘蟬響疎松逗夕暉晴雲生翠壁秋水到荆扉

野外村常靜山中客自稀
愛君姚許句林壑有光輝

題族弟推叙惇九詩卷後二首

愛爾吾宗秀詞華迥不群
風前思玉樹卷裡挹清芬
秋水幽々色春空藹々雲
老夫詩興懶對此一氤氲
幸有殘書帙餘生一草亭
盛年真可畏古調孰能聽
聞道頭先白論文眼或青
君看賢達士誰不藉遺經
澹圃再暮已過感懷有作

羨子先歸地
天皇已再回
杞憂堪痛哭
楚些轉多哀
有夢來孤枕
無書寄夜臺
平生君父念
到死未應灰

初聞邊警

不識兵戈事吾生及盛時驚聞桴鼓動愁見羽書馳
國步方多難天心欲轉危承平猶在眼衰白淚空垂

春愁

又過鶯花節關河尚用兵陣雲連海戍戰地廢春耕
鞞鼓思良將戈矛振義羣忍能忘大德盜賊亦蒼生

喜西師告捷

邊塞氛祲靜山河氣象新聖朝非尚武邦域自歸
仁憂樂同黎庶安危仗大臣此生隨野老長作太平
民

清明下或有
日字

清明留楸谷墓舍

音容長寂寞時節又清明餘慶應詒後孤兒媿忝生
詩書誰復緒忠孝竟無成它日重泉下何辭敢慰情
秋日過宋老楸谷舊居

宋老今年歿孤墳萬木中力田遺世業爰客本淳風
清晝茅茨靜深秋櫺楹紅山村皆舊識真樸念斯翁
即事

散跡非逃世深山且寄居貧猶羞乞米老不厭餐蔬
曉枕尋佳句秋燈讀細書縱令遺草在休作馬相如
入都歸路過成青城踈山舊廬贈其胤龍汝海

應二首

耆舊風流盡，那堪暮笛聽。
迢深元亮宅，客到子雲亭。
樹石傳三世，兒孫守一絰。
階前書帶草，猶似往時青。
山中鷄黍約，頭白又經過。
霜稻當門熟，秋花繞屋多。
貧非原憲病，狂作接輿歌。
余亦懷歸隱，相期在澗阿。
詣赤裳山史閣，歷憩茂朱叟睡亭。
感懷有作

伊昔觀風地，重過問幾春。
溪山應識我，簪紱却羞人。
樓月渾如夢，汀花不染塵。
試招沙際鶴，知汝是前身。

午入龍潭縣

青山環小縣，人在畫中行。
空翠隨車合，微風卷旆輕。

官逾僧舍寂泉比客心清便欲携家住耕漁送此生

健陵諱辰鎮安鄭使君

世翼

有詩見寄奉和

未遂攀龍願雲輶倏上征民今思至德天豈惜治平

渺爾欄花夢惘然

廟瑟群遺臣中夜淚多半為蒼

生

重登寒碧樓用壁上韵志感

慙非郭細侯重到似并州竹樹當年色溪山此地幽
羈懷憑落日衰髮照新秋幕府今誰在空悲庾亮樓

山雨

溪風嘉樹脩竹皆甲寅舊題
中語其時幕府諸人無一在世者

將歸洞陰行過東城思賴南相國見枉郊次臨

別奉贈二首

黃閣調梅手青山把耒身舊遊如隔世相對是陳人
志節窮逾見交情老更真臨風翻惜別花外駐高輪
軒冕非吾分林泉有弊廬祗緣衰疾久遂與世情疎
已下忘機鳥時觀自樂魚素心公獨在休道莫知余

蓮堂夏夜

雲裡生華月微看草露光柴門時散策池樹共移床
石冷談僧古荷深侍僕香不知塵世內能有此清涼

曉起看雪

卧聽風洒雪終夜響蕭蕭低壓窓前竹平糴谷口橋

鶴儀寒逾肅禽語凍難嬌錯比山陰與鄱朋折簡招
詩七言律詩

九月寄湖西友人

送君為客錦江濱楊柳離亭颺塵晚歲羈遊驚髻
髮衡門高卧厭蹄輪一天寒雨連南國兩地黃花憶
故人却把詩篇遙寄意蒹葭秋水鴈初賓

吳園看花

幾處名園載酒過吳家亭子北山阿草堂今見盧鴻
乙種樹能如郭橐駝遲日蒸成花氣暖微風扇送鳥
聲和肯教遊客來同飲賓主閒情較孰多

秋懷

門巷蕭條過客稀樓頭終日坐忘機看書正覺閑居
好對酒還憐俗態非秋水伊人如可見梅花高士願
同歸百年自是須臾事將此心期且莫違

秋夜宿玉流堂

幽尋每趁菊花初為是吾宗舊退庐戶外青山長偃
蹇村邊黃葉日蕭疎古人亦愛秋冬際名士元宜木
石居却有鳴泉能會意終宵滯：自循除

鄭戚丈子華甫以書求余八分書

細磨螺子李翁丸戲點烏絲翟氏欄

董道廣川書

跋

求豫章黃魯直書

書未張軍韓阿八買詩能名世鄭都官自

知翠墨徒成癖且把金針快許看

元好問論詩絕句
鴛鴦繡了從教看

莫把金針與人

安得中郎傳古學為君重寫六經丹

寄題忠州趙處士行龜開天山居

聞說南州處士廬山深地僻西園如夜燈身健猶教
子春雨家貧未燒畬十五年曾索下憩三千卷復燼
餘書扁舟一棹驅江水擬向巖阿賦卜居

喜鄭戚丈見過

蒼苔落葉掩門重幸有佳賓日夕逢謝病端非緣骨
傲論交元自覺心慵秋來庭戶蟲群集霜後衣冠菊

氣濃身外悠々何足問不如把酒對西峯

送金君

成礪歸定州

秋風蕭瑟湏江波衛滿山河走黑羸野店行隨明月
宿重關路入翠微多上書不索長安米彈鋏空為客
舍歌萬事休言歸去好看君壯志未消磨

講庭記事

丙申正月十五日

王世孫邸下御興政堂

設專經文臣殿講應講七十六人以禮記進
者獨臣書九一人晡後自內厨宣賜酒饌承
恩感激退成一律

陵一作州
天中玉座五雲層
執冊群儒次第升
永晝丁東宮漏
動微風
陸續殿香騰
起家當日惟蕭奮
重席何人又
戴憑不是小臣稽
古力彤庭懷校婢
心增

望押鷗亭

危亭縹緲枕湖雲
無限晴沙眺望紛
沕水風帆橫岸
去廣陵
烟樹隔江分
青山眼冷皇華使
芳草魂消上
黨君
文物豪華俱寂寞
至今惟有白鷗羣

幽居

幽居寂莫斷塵蹤
雲樹秋光鎖幾重
紅藕池塘時下
鷗碧花籬落亂鳴
蒼身閒未暇
成中隱志拙端宜學

老農我欲歸休聊自適近名何必似晏容

田園即事

柴門新拓數弓荒真是終南舊草堂
藜杖閑聽田水響筍興時過稻花香
魚梁夜火歸寒雨蟹窟秋烟拾
早霜始信鄉園風味好百年吾欲老耕桑

和仲牧見懷之作

林泉遯跡為藏名祇有幽愁隔弟兄
無那雲山遮曉夢不堪霜樹送秋聲
西風古郭牛羊下落日荒村市
豹橫回首京華行樂地憑君詩句慰離情

野亭

偶因嘉樹結茅亭，便作坡翁擇勝銘。
落日遙聞樵唱返，深林時見醉人停。
池花沒骨徐郎墨，野水分頭酈氏經。
一點塵機那到此，支頤獨對數峯青。

紫藤嶺

懸崖絕磴路盤紆，滿眼烟霞筆底輸。
紅樹遙分弓裔國，蒼山橫斷貉王都。
西風瑟瑟颯吹衣，袂袂秋色迷茫入畫圖。
往蹟如今誰可問，殘碑明日訪彭吳。

華嶽西支蟠據鐵原

永平間其東為春川府相傳漢彭吳碑在其地今亡

寄洛中故舊

問余何事愛山林，靜處方能適素心。
礪戶蒼苔馴子

鹿石田秋雨種人復白雲長在誰堪贈芳杜相思怨
不任為報宗雷諸社友匡廬何日共題襟

酬寄仲牧

通來獨向碧山居求點風流我不如浮世曾知齊一
馬羨人長憶寄雙魚行尋澤畔披裘叟歸把溪南種
樹書物外逃名君莫笑祇緣多病遂吾初

近菴金丈曾約卜隣前年出守安東奉懷寄呈
曾陪杖屨沂江流一擢看山過廣州細雨催花明古
渡微風吹浪送孤舟田園水北方歸隱耆舊天南尚
滯留遙想絃歌多暇日相思應上映湖樓

送金君歸定州

縣白州青鴨水東獨携書劍又西行
句驪故國秋雲外荀彘殘營夕照中
千里関河驚落木百年身世歎飛蓬
勸君痛飲離筵酒莫學楊朱泣路窮

寄題李君德初橫城山居

君為吾家舊客晚居
橫城工草隸常以漁

釣自適

晚歲栖遲在磻阿數椽茅屋掩松蘿
晴窓每試蘭亭帖暮雨時披笠澤簑
坐處青山捫蝨話歸來白石飯牛歌
不知黃綺何為者祇是清閒享得多

送仲牧讀畫駟上曰呈內舅金文履澤

迢遞東鄉負笈行臨歧把酒不勝情葉飛征路驚秋
色人在孤舟聽鴈聲當代諸生推郭泰少年遊學縱
陳平黃驪耆舊如相問為道今來且耦耕

計仲牧已至驪上悵然有作

滿地菰蘆起暝烟秋江何處孝廉舡夕陽帆落丹楓
外暮雨人歸白鴈邊月色偏從今夜好寒花猶作舊
時妍東山昔有分鄰約小別如今劇可憐

送李懋官往湖西監穫

親老家貧奈爾何能從鄙事未為多豚蹄路有豐年
祝牛角人無上相歌晚歲頭銜司稻士迂儒功業力

田科畜鷄種黍知渠分王道由來不在他

新春邀鄰友同飲

池上輕冰漾綠鱗韶光又是一年春
番風過處知梅信舊雨來時作酒人
高卧何關門外雪閒居祇掃室中塵
堂中歲月君須惜莫使浮名誤此身

送人入藩

使者星輶又北馳清秋路入渾河湄
遼金割據更三姓衛霍功名只一時
虎逝龍亡當日恨烏頭馬角至今悲
人民城郭應依舊為訪令威問盛衰

和仲牧羣爾命篇情見于詞

駉蛩身古恨分居一日相離數歲如祗許蟬祥來午
枕獨憐山色照殘書愁雖有酒銷難盡詩為無朋興
轉踈懇願移家同里住看君家具小於車

孟郊詩借車載家具

家具小於車

九日小飲和仲牧

峨洋誰奏伯牙琴舉世無人識此心弱冠詩書雙髻
改重陽風雨一燈深何須坐作洛生詠不敢空為梁
甫吟醉後相看黃葉裡狂歌多半屬商音

賦得寒柳

春城幾處拂千絲曾與行人管別離北去英雄悲昔

日南朝名士憶當時每依夕照生衰影為傍煙波蘸
卧枝莫道逢秋搖落盡東風亦有再來期

秋夜感懷寄示仲牧二首

靜裡翛然夜氣通善端萌處驗天衷光陰枉費優遊
日心地全無撲案工訟過猶為君子道固窮真是古
人風從今始得依歸所遺訓昭森仰晦翁

願我長為物外民此心惟可質天神四時魚菽供先
祖五畝蚕桑奉老親白首窮經詩禮學青山結屋第
兄鄰縱然草木同歸盡猶是雍容自得人

蛺蝶三首

朱、白、小園中蛺蝶紛飛作一叢、却疑莊周
夢、輕、還似魏、收風乍經巾袂、餘香濺偶立階前澹
影籠盡日尋芳無定處、過橋頻趁賣花翁

悠揚不已戲新晴、得意逢春兩翅輕、舞處渾將飛絮
合、飄來偏向綠蕪明、初開蕊、國分茅土、好與蜂王結
弟兄、管領繁華能幾日、無端風雨、取閑情

金粉裁衣點綴勻、林間羽化想前身、遲回細草憐斜
日、依戀殘花惜晚春、謝氏詩中曾入譜、滕王函裡舊
傳神、一時紅紫終成夢、看取孤松翠色新

夏日閒居

林下蒼苔日漸深
簾櫳積翠晝常陰
好看脩竹真名士
獨抱孤桐更素心
一枕清風茶響細
半窓疎雨篆烟沈
藤床睡起渾無賴
自寫新詩自愛吟

秋懷

四壁蟲聲獨倚樓
回頭天地已新秋
西風如水碧梧冷
白露無邊銀漢流
節序偏生浮世感
襟懷願共古人遊
銷愁自有樽中酒
何物能銷醉後愁

古木寒蟬擁一樓
登臨蕭瑟易為秋
文章底事多窮命
畎畝由來足勝流
盡室方謀伊賴隱
名山長憶向禽遊
自知骨相峻嶒甚
掩是詩愁又病愁

早發抱川

鄉園歲々未言歸
匹馬西風始拂衣
野樹微黃人獨去
寒溪一碧鴈初飛
悲秋詞賦才情減
半世行藏志事違
莫道今年霜信晚
麝峯紅葉也應肥

晚至洞陰丙舍同仲牧二首

洞府蕭森石逕幽
百年茅屋此間留
枯荷鷗宿虛塘雨
衰柳蟬嘶兩岸秋
素契林泉同把臂
緇塵京洛懶回頭
西風款款歸鄉里
不媿吾家馬少游

池荷淨綠野棠斑
流水斜迴碧玉環
十里人隨殘雨到
數家門對夕陽閒
貧居風味周顒菜
高士生涯謝

眺山已辦他年歸老志秋來叢桂更堪攀

金水亭

翠柏丹楓擁一邱名亭勝槩水西頭川群暮挾平郊
兩山勢遙圍小縣秋客子登臨分物色主人高卧自
風流蓬萊仙侶今安在惟有銀鈎石上留

岩上刻楊蓬萊士彦

詩

過鐵原

石路羸驂倦不前孤雲落照潏無邊山寒草木皆秋
意野曠村墟只暮烟壯士果尸哀絕域奸雄竊國笑
當年羈懷到處偏多感地近関河倍悄然

病餘諸弟小集和仲牧四首

少年志氣亦豪雄今日摧殘病鶴同嗜退端宜稱漫
叟謀生却笑似愚公夢回竹影花香裡身在書堆藥
裹中祇有耽詩成苦癖微吟竟夕和秋蟲

墨香筆妙闔杯巡舊令還依石季倫豈是清談閔晉
室偶然佳句逼唐人愁邊落葉催殘景坐處寒花出
俗塵借問紛紛車馬客何如林下作閒身

霜林露出玉峯寒秋色剛宜病後看舊種青松憐老
大新栽黃菊喜平安試携藜杖頻移帶為上高樓且
整冠寥落渾如僧退院弟兄相對一蒲團

平生薑桂性相宜，賴有殘書俗可醫。
古意多從閒處得，幽情偏向病中知。
碧苔暎暗時行藥，黃葉攔深坐看棋。
王謝風流非我事，祇願同此好心期。

仲牧新葺草堂有詩和韵二首

步屨相尋未覺遲，君家入望已先知。
臨門特種陶潛柳，遍屋新題杜甫詩。
文字祇應存大雅，風流終不合

當時古來賢達皆如此，且就花前倒百卮。

仲牧嗜杜詩立春帖

于皆署少陵佳句大書其門曰鵝鴨宜長數柴荆莫浪開見者解頤

竹几藤床睡起遲，一年春興靜中知。
香殘宿墨臨新帖，日永虛窓勘舊詩。
蘓病偏逢花放後，誅茅恰趁燕

歸時會心人少流光速勸爾休輕到手卮

初冬偶興

青菱常遣髻絲催頭上雙丸往復來碧甌歛容霜後
出黃花強項雪中開炎涼歲事輸紈扇深淺人情付
酒杯一縷爐香畫萬卷不知門外有紅埃

騎省內直東外司郎徐公羨

迂儒聖世感遭逢日月瞻依近九重地肅端宜存
警畏官微那堪任踈慵周庐環列星常拱簿領成堆
印不封羨殺南曹徐騎省綠槐高閣午眠濃

內巡

萬戶千門取次行長廊時見燭輝明星搖西閣叅差
影風送銀壺陸續拜即署敢悲顏駟老豎儒終愧畢
誠名宸遊正作勾天夢却恐彤墀履響生

送人出宰海西

漢廷剖竹屬循良五馬初春出帶方驛樹連雲迎皂
蓋官梅衝雪映銅章十年花石存經濟一郡絃歌荷
寵光好把此身酬聖主璽書應復見徵黃

世子宮春帖子

玉管飛灰協律初銅龍門外瑞暉舒衣添去歲裁時
尺案有前秋講後書夏啓仁祥延頸早周王身教正

心餘詞臣欲獻三元頌爭道星輝海潤如

文孝世子輓詞四首

玄端玉帶儼高臨貳極門前簇佩簪小海紅雲瞻日
角晴空瑞旭識天心詩聯寶藻羣工唱慶溢恩波匝
域深萬歲岡陵齊獻祝那知人事竟如今

春闈五載仰明离雖是冲岭已聖姿主鬯早承

宗社重含飴長慰殿宮慈文思不待能言日至性

先者在抱時二字微称昭節惠青編端合後來垂

虞歌此夕倏相催丹旌徐移羽衛開鳳闕回瞻新
近蜃車攀送舊僚哀忍將遺帙随明咒祇有貞珉賁

夜臺可耐 喬陵秋謁日宮官無復問安來

尚憶宮啣荷寵榮銅龍初日接羣英黃華講席今如
夢盡閣紗籠舊記名盛事還令多感涕哀詞那得罄
微誠秋風執紼城南路不忍重騎賜馬行

即事二首

病裡偏驚歲月侵滿城霜氣動繁砧寒虫相語碧花
晚瘦鶴孤眠黃葉深豈有書生論國事終知黨議誤
人心紛紛得喪塵寰夢未抵西窓一醉吟

蓬門深閉似逃虛稱是蕭閒退士庐懶向紅塵連駟
馬喜看碧海掣鯨魚微霜着樹秋容淡冷日籠花午

影踈酒椀茶鎗風味在如今始得返吾初

李平子安中自丹陽至會洪子中樂正新居曰

贈別二首

髣髴蒼然去歲如一樽談笑菊花初秋風湖海人方
到落日亭皋葉正踈友道誰能相下馬宦情吾亦欲
焚魚十年種樹真良策歸讀山中計子書

簾捲秋山雨響紛幾回搖落歎離群吟邊歲色攀紅
樹夢裡閒情話白雲我似孟嘉知此趣君如韓愈恠
於文茶殘菊冷西窓下不惜留連到夕曛

平子素不
能飲出其

文數篇
甚佳

徐判書有慶輓

奕世簪纓舊德存
明廷接武弟仍昆
綵衣庭列三蘭秀
朱芾班瞻九棘尊
雅望元知推國器
恩榮終不藉侯門
即今耆老凋零甚
回首秋原倍愴魂

練光亭會平壤亞尹曹令士元允大陽德宰李
令士仰恭永

繁華自昔擅西州
今日忻從茂宰遊
草樹微茫分大野
江山窈窕入高樓
深春冠蓋乘閒至
竟夕笙歌為少留
謫下人間猶勝地
知君元是散仙流

浮碧樓

西京佳麗稱前聞更有茲樓絕俗氛
繞郭長江明似月中洲小嶼點如雲
青山影逐帆三轉翠柳陰藏屋
一分極目烟波生悵想清流壁外送斜曛

台公臺望鬱陵島

風引輕舟轉杳冥神山縹緲隔層溟
明粧照日開暉萼澹翠浮空點一萍
獅子不來雲水白蝦夷相去海天青
仙區物色無人見漆匙花應滿地零

漆匙花見酉陽雜俎

夕過西鄰趙進士

時簡

父老驚看病後顏杖藜今始出荆關
人家祇隔寒烟外野路微分積葉間
稻壠虛明生白水柳林踈闊露

蒼山鄉園故舊應相憶客裡新交有往還

謫居雜詩四首

紅塵十載上烏紗贏得人間兩鬢華
曉夢頻驚臺省漏春愁重對塞垣花
差池宦業羸藩角怏悵年光赴壑蛇
今日砥平村舍裡又看西照滿牕斜

逐客偏深去國情殘年風景忽崢嶸
林鷁錯落烟光暮野雀紛飛雪意生
幾日長沙回賈誼至今漳水卧劉楨
閒中賸得添書課永夜寒窓對短檠

文章經術拙蹉跎惟有君恩似海波
萬事常言明日在行年漸比古人多
栖遲未作歸田賦慷慨徒為

題下當有三首
二字

對酒歌定使能詩成底用謾將秀句覓陰何
煇旭烘臨夢蝶床朝來猶未整冠裳瓶泉細試烹茶
味爐火時尋爆栗香客久新知如舊熟心閒冬日抵
春長一身除是君親念高卧何妨作故鄉

謫中蒙 恩賜壬子曆書感懷恭賦

微蹤曾忝鳳池班玉曆猶從故事頒恩露溼封丹篆
重天香透紙墨花斑 聖心記舊非遺履臣辜難容
未賜環三百六旬兼六日夢中長願近威顏

除夕次東坡韵

除却新愁與舊悲
夢騰都付醉鄉微
一身墮地便催

老萬事從天休念歸向客星河低欲轉隔隣烟火耿
將稀婆娑獨愛燈前影竟夜寒窓許共依

年光世事水同徂轉眼升沈判兩塗楚澤方紉遷客
佩漢廷曾剖使君符杯中冷暖傾藍尾鏡裡華枯照
白鬚好向江頭理歸櫂桃花春漲膩如酥

壬子元日

新歲羈懷強自寬一番春意曉來看山容雪色爭回
暖柳眼梅梢欲破寒兒女熙怡聞笑語村鄰淳古見
衣冠還慚地主憐孤客官酒慙慙送賀盤

和康生見懷詩二首

康生名文禧雲山人父壽長少從寤齋趙公
遊聞三淵金先生之風喜詩歌古文辭既歿
生緇父志隱居山中余守寧邇得壽長文奇
之從生求見其遺集及解官將歸生忽來見
曰此足不出山已十年今日為公一出爾因
留飲數日而去今春又寄見懷詩數十篇遂
作此以謝之

名姓羞將史筆垂平生空抱好心期謾傾草野憂時
淚獨賦林泉感興詩水北山人嗟已老関西夫子有
誰知憐君不負便々腹一字如今未救飢

白眼踈眉野鶴身
花前長揖古衣巾
官樓落筆燈生
暈池閣傳觴酒
感鱗開口便談
天下事知心惟
許卷中人紅橋
判袂渾如夢千
里相思又一春

達川吊古

彈琴臺下水粼粼
往事淒涼閱幾春
恨入江舛流不
盡魂迷草色碧
無垠空聞突騎
能輕敵却怕兵
仙解誤人聖代
不忘陰雨戒莫
言長策在交鄰

童子得一野鴨
置盆池中悲鳴
不食作詩放之
盡日徘徊傍小
池綠頭紅掌可
憐姿初非甫里
能言族偶入花
溪託意詩海鳥
寧知鐘鼓樂冥
鴻不受稻

梁欺從今水濶雲多處記取樊籠鍛羽時

恭賡 御製謁 思陵志感詩

二百忠臣保歲寒清冷九曲善鳴灘山哀浦魚千年

在天理人情兩地安靈雨飄來隨法駕彩虹飛處見

新壇自前謁 陵日輒有微雨人謂靈應今年設配

而設蘭臺汗簡紆宸感越樹秋深玉露溥

恭賡 御製 皇壇親享日敬次 兩朝御製

詩

吉日 皇壇裸享親三回渚灘紀餘春文章周禮猶

存魯時世王風已訖陳禾黍 諸陵空入望蓁苓下

國尚沾巾 英靈赫々應監在江漢依然禹蹟遵

秋日書懷

久塵樞要媿菲姿默想初心只自疑疎雨適來醒酒
後新涼已近讀書時 主恩欲報成何業歸夢相牽
續舊詩鼎々流光生百感夜窓惟有候虫知

恭賡 御製謹題敬奉閣詩

萬里扶桑息海濤汪洋帝德及秋毫王春不改車書
舊雲漢重瞻棟宇高周禮即今徵外服秦風當日願
同袍更憐東李家拜古遺烈猶傳匣裡刀

出郊解官將歸洞陰故廬

臨水軒窓暑氣收偶然栖息卜清幽徘徊野鶴將斜
日蕭瑟林蟬又一秋南畝終成歐老志東山猶有謝
公憂安危廊廟諸賢在好借餘年伴海鷗

奉使龍灣留別松京徐留守公羨

名都出守有賢侯千里星軺此暫留嫩柳繁花新氣
色清香函戟舊風流樽前謾下憂時淚関外翻生惜
別愁見說東湖春水綠為吾添買一漁舟

統軍亭

鴨綠江流氣不平危樓徙倚一樽傾林間獵火婆娑
路海口風帆泊汧城千里提封空設險百年廊廟罷

談兵顯忠祠屋留天地終古英雄涕淚橫

冬日歸洞陰山居

柴門常對數峯寒
歸卧田園歲已闌
恠石長松人外境
踈櫺殘雪雪中看
讀書漸惜餘年短
閱世方知晚節難
滿目溪山如此好
白頭何事始休官

重遊白雲寺題僧壁

丁酉余嘗一遊茲山

招提高入白雲間
筇屐相隨倦鳥還
一壙清涼依夕日
數僧牢落對青山
鐘聲不隔烟中迳
嵐翠全迷柳外灣
三十年來塵土夢
讓渠消受一生閒

山居冬夜

磴道縈回積雪明萬峯深處一柴荆山空蘿月猶相
照夜靜松風自作舞鋤可帶經將送老屋能因樹未
藏名始知子驥真高士聞說桃源便欲行

涓上思歸書示李君四首

時臺臣有凱攻海
伯而並及余者

水國蒹葭露變霜三秋宦跡滯殊方夜深孤月當空
白歲暮寒花特地香蕉鹿如今真似夢尊鱸何必始
思鄉江舡在否吾將去好與征鴻作一行

拙性從來與俗違白頭旌節計還非誰知魯國真男
子臣本南陽一布衣晚歲祇宜甘稼圃初心豈肯慕
輕肥山中酒熟梅應發不是人言也合歸

十載低回未掛冠
世間榮辱太無端
平生不作因人熱
遲暮猶思大庇寒
煇、襟懷知自貴
蕭、鬢髮笑相看
賢愚莫千秋事且
取樽前此日歡

莫將龜策問行休
一錯徒然鑄九州
萬事在天須信命
四方無地可埋憂
畫墁豈為求人食
筭室終難聽道謀
唯有長江知我意
更牽歸夢日東流

今春涓城失火延燒

官廨民居四千餘區
余在任後始為葺理

山村秋興

數頃荒畝報歲功
更無餘事惱閒翁
書聲月落河傾後
詩意山紅礪碧中
身老端宜娛晚景
村深猶得葆

淳風他年若問幽栖處錦柱西邊鷗水東

鄭戚長子華甫自平山徒步數百里來訪山中
經旬而返謹次其留贈詩韵曰叙別懷

方谷丈人甘隱遯文園居士久歸休不辭行路風鰲
面共對寒窓雪滿頭盡室君探巖下來餘生吾付葦
間舟一樽他日難重會長夜聊為秉燭遊

秋晚

過眼流光為底忙深秋節物轉淒涼啣山落日依々
景卧地寒花冉冉香末路憂虞同失馬平生志業歎
亡羊衰顏却似經霜葉且對庭柯自引觴

次韻士聞新春書懷

問訊寒梅第幾風春光有約到山中任教短髻欺霜
白強把衰顏借酒紅慣歷危途悲老馬未逃塵網媿
冥鴻忽忽四十年間事雲在長空水注東

山居春晚

風雨經旬獨掩閤回頭春物已闌珊半規林外昏黃
月一抹溪南澹碧山茅屋石田非拙計桃花流水異
人寰素心不必羊求輩野老鄰翁自往還

聞都下謠傳余已作古人戲作一詩

瞿塘萬斛涉驚濤處世奚殊寄一毛自輓終非元亮

達虛名敢擬子瞻高山樵水釣成真隱史馥經腴作
老饕餐定使芙蓉城裡住風流應復讓仙曹

再從弟鳳來冕九寄詩見懷次韵以荅

歷盡羊腸始稅車晚來林下賦閒居敢云達士能齊
物不學潛夫強著書採藥將尋商嶺隱種桃休引武
陵漁縱令少住人間世等是浮雲過太虛

來詩有于
今髭髮猶

平昔人道登仙
是妄虛之句

傷逝二首

一別茫然歲月更寒梅又吐臘前英人無兒女方稱
死世少親朋孰慰生縱使遐齡猶抱恨未應長夜便

忘情知君草露松風下重為衰翁淚亦傾

隔歲儀容夢裡昏空江積雪阻來魂嗟吾後死真窮
命似子先歸却寡思萬事成陳將撤几一身如寄只
閉門眼前多少傷心處說與何人報九原

趙君有約不至賦此却寄

愛君江左舊風流青眼相逢已十秋句比梅花能絕
俗人如諛草可忘憂幽期晚晚霜侵逕永夜徘徊月
滿樓欲把瑤琴彈一曲小山叢桂足淹留

偶成

漫興詩篇亦懶題閒心都似絮黏泥忽聞孤鶴時推

戶靜玩游條獨倚藜好友漸看星向曙殘年已到日
平西名山不用千金買白髮婆娑舊釣溪

余久欲移居竟不果

萬景臺詠次圃隱先生元韻

高臺徙倚暮雲橫
悵孤臣去國情
數疊青山圍曠野
萬家霜樹擁重城
西風浙瀝秋聲至
落日蒼茫海氣生
為是圃翁吟眺地
天涯獨自望神京

壺山館留贈新使洪成伯夔周

東南民力困饑荒
拯濟先須刺史良
我媿寇君治賴郡
公如汲直卧淮陽
十年淪落丹心在
千里逢迎白髮長
同是先朝香案吏
好將經術荅明王





3 7/8 ..



